


揚州府志




			九	漢
		一〇八	〇	書
	一	二	三	門
〇	四	函	號	
冊	架	類		

元	九	漢
二	〇	
八	八	
〇	二	

內閣文庫			
番號	漢	9082	
冊數	10 (8)		
函號	292	33	

卅之二

八



揚州府志卷之三十

人物三

淺草文庫

忠節

漢臧洪字子源廣陵射陽人舉孝廉補卽邱長中平末

太守張超辟為功曹時董卓圖危社稷洪說超誅之超

乃與諸牧守大會酸棗設壇將盟而更相辭讓莫敢先

登或共推洪洪乃攝衣升壇搽血而盟辭氣慷慨聞其

言無不激揚自是之後諸軍各遲疑莫適先進超乃

遣洪與劉虞共謀而值幽冀交兵行途阻絕因寓於袁

紹紹奇之與結友好以洪領青州刺史遷東郡太守時

曹操圍張超於雍邱甚急超謂軍吏曰今日之事惟有
臧洪必來救我或曰袁曹方睦而洪爲紹所用恐不能
敗好遠來違福取禍超曰子源天下義士終非背本者
也或見制彊力不相及耳洪聞超圍乃徒跣號泣將赴
其難自以衆弱從紹請兵紹竟不聽超城遂陷張氏族
滅洪由是怨紹絕不與通紹興兵圍之歷年不下使洪
邑人陳琳以書譬洪洪荅曰昔晏嬰不降志於白刃南
史不曲筆以求存故身傳圖像名垂後世洪投命君親
策名長安夫復何言紹見洪書知無降意增兵急攻城
中糧盡外無援救城陷生執洪紹盛帷幔大會諸將見
洪謂曰今日服未洪瞋曰惜洪力劣不能推刃爲天
下報讎何謂服乎紹乃命殺焉

後漢書

陳容廣陵射陽人少爲諸生親慕臧洪隨爲東郡丞袁
紹之難先城未被洪使歸紹及紹將殺洪容方在坐起
謂紹曰將軍舉大事欲爲天下除暴而先殺忠義豈合
天意今洪本爲郡將奈何殺之紹慚使人牽出謂曰汝
非臧洪疇空復爾爲容顧曰夫仁義豈有常所蹈之則
君子背之則小人今日寧與臧洪同日死不與將軍同
日生也遂復見殺在紹坐者無不歎息竊相謂曰如何

一日戮五烈士

後漢書

蔣子文廣陵人漢末爲秣陵尉逐盜至鍾山爲盜擊傷其額死後吳主追封爲都中侯立廟祀之

明南畿志

梁來嶷字德山廣陵人幼有奇節侯景陷臺城廣陵太守祖皓在城中將見殺嶷乃說皓起兵討逆皓曰僕所願也死且甘心爲要勇士耿先等百餘人襲殺景黨董紹先及皓敗嶷并兄弟子姪遇害者十六人

梁書

隋來護兒字崇善江都人幼好奇節讀詩至擊鼓其鏜踴躍用兵羔裘豹飾孔武有力舍書歎曰大丈夫當如是安能久事隴畝羣輩壯其志賀若弼之鎮壽州也常令護兒爲間諜授大都督平陳之役護兒有功焉進位

上開府從楊素擊高智慧於浙江賊據岸爲營周二百餘里船艦蔽江素令護兒率數百輕艦徑登江岸直掩其營破之賊潰散護兒追至泉州智慧窮蹙遁走閩越進位大將軍除泉州刺史時盛道延擁兵作亂護兒進擊破之又破汪文進於黔歙進位柱國仁壽三年除瀛州刺史賜爵黃縣公大業六年從駕江都賜物千段令上十人家宴父老州里榮之數歲轉右翊衛大將軍遼東之役護兒率樓船指滄海入自泚水去平壤六十里與高麗相遇進擊大破之乘勝直造城下破其郛郭明年又出滄海道師次東萊會楊元感作逆勒兵與宇文

述等擊破之封榮國公十年又帥師渡海至卑奢城高麗舉國來戰大破之斬首千餘級將趨平壤高元震懼遣使上表請降尋有詔旋師轉左翊衛大將軍開府儀同三司江都之難宇文化及忌而害之長子楷以父軍功授散騎郎朝散大夫楷弟弘仕至果毅郎將金紫光祿大夫弘弟整武賁郎將右光祿大夫整尤驍勇善撫士擊羣盜所向皆捷賊甚憚之為作歌曰長白山頭百戰場十五五把長槍不畏官軍十萬眾只畏榮公第六郎化及反皆遇害惟少子恒濟獲免

隋書

唐來濟江都人護兒少子也宇文化及之難濟以幼得

免轉側流離篤志為文章善議論曉暢時務入唐擢進士累官同中書門下三品封南陽縣男遷中書令高宗將以武氏為后濟諫曰王者立后以承宗廟母天下宜擇禮義名家幽閉令淑者副四海之望稱神祇之意武氏立銜之顯慶初兼太子賓客進爵為侯二年兼詹事尋坐褚遂良事貶台州刺史久之徙庭州龍朔二年突厥入寇濟總兵拒之謂其眾曰吾嘗絿刑網蒙赦死今當以身塞責遂不甲冑而馳敵歿焉贈楚州刺史

唐書

宋沈攸字子宜揚子人建炎三年賊邵青犯真州攸攝揚子簿以狀白府乞以所糾土兵禦之賊勢張甚攸挺

身拒敵北門死之

嘉靖惟揚志

唐璟字用章楊子人父寔紹興間嘗領鄉兵拒敵馬鞍山獲功補官開禧間金人南侵六合至儀真將逼惟揚時璟總轄民兵親率子弟及所部強勇斷橋填堰謀決陳公塘以拒之塘隸轉運使擅決水者死罪衆欲請之官璟曰必待請豈能及事乃決水俾東與句城塘會接廣陵城南西連儀真南際運河北距岡隴平原曠野不日成巨浸敵騎登焦家山望而驚遁州賴以免臺府欲上其功將命之官以疾不就後權和州倅金人屠城遇害事聞贈官錄其子弟

儀徵舊志

吳駿發江都人紹定間李全攻揚州郡守募良家子守禦駿發應募賊平補將校後以轉戰有功累遷鎮江右軍統領元兵據盱眙宋遣兵攻之駿發爲前鋒建螯弧先登將一鼓而下會元援兵至駿發死之事聞賜恤甚

厚 明南畿志

張琰字汝玉廣陵人身七尺修髯倜儻有節概宋末補州牙兵隨制置李庭芝潰圍赴行在爲追兵所及力戰死琰能詩皆忠憤所發

明南畿志

嵇聿高郵人所居名嵇家莊當文丞相天祥見逐於真州潛行至聿莊聿迎事於家修禮甚謹復津遣之使其


子與客伴送至泰州於是天祥得由通州航海達閩赴
行在及工部侍郎柳岳奉降表於元道經嵇莊聳憤而
殺之明學士程敏政嘗稱為義俠有弔嵇莊辭 名勝志

龔樂字深文高郵人累官中奉大夫歷知長洲縣官至
司農卿宋亡士大夫居班行者隨例北上渠行至莘縣
憤惋不食而卒 高郵舊志

元樂鳳高郵人任諸暨知州會方國珍叛總制謝再興
謀襲城以應之鳳與妻永訣曰為臣守國而舉城降賊
非忠也吾得死國事足矣及賊入與其妻王素英俱罵
賊被殺州人收其屍葬苧蘿山 高郵舊志

劉秉中高郵人授兩浙行臺御史方國珍叛秉中懷印
將走大都遇害 嘉靖惟揚志

王信字國寶父瑄元末為淮南北義兵都元帥田豐作
亂信從察罕帖木兒大破之還鎮沂州領沂國公印授
江淮中書省平章政事明太祖命其甥碩師魯致書帛
往說之不就羈師魯欲殺之徐達師至淮安復使人說
瑄瑄佯許降上密諭達令勒兵趨沂州觀變達至沂又
約瑄瑄又佯許之而閉門堅拒達遂進兵攻破其城勒
瑄招降信瑄陰遣家將鄧春從間道語信且命之曰見
當奮臂一呼以報國恩以雪父恥無以余為念而以偽



書付使者信殺使者罵不絕口達遂殺瑄信走山西陰
集兵再舉不遂避跡於興以憂憤卒其子孫占籍興化

更其姓曰任

興化舊志

明王鼎儀真人為趙忠養子明初忠渡江從征有功於
於陣鼎襲其職復姓王命守太平陳友諒以重兵來犯
城中僅守兵三千鼎與花雲竭力堅守友諒攻城三日
不下引巨舟泊城西南士卒緣舟尾攀堞而登城遂陷
鼎罵賊不屈死之追封太原郡侯立忠臣祠於太平命

有司歲時致祭

嘉靖惟揚志

顧師勝字惟賢興化人洪武十二年由辟薦知四川眉

縣事川賊天龍保作亂謀襲城師勝率兵禦之賊勢猖
獗師勝親督兵於三橋舖與賊力戰屢敗之因追賊下
阪馬傷足被刺露腸而死事聞贈奉議大夫眉州知州

仍陞眉縣為眉州

興化舊志

郭任江都人建文時為戶部侍郎靖難兵至被執不屈
死裔孫永寧以進士官御史

按李氏續藏書謂任丹徒人而萬曆府志載入江都

因之

成諧字和仲興化人少補邑諸生負奇節好佩刀劍嘗
信數術自詫當立功異域久之總督翁萬達招置幕府
與河南諸生王邦直皆見倚重嘉靖乙巳秋大同有寇

警諸以鐵裹關鶉鴿峪係諸邊要害勒兵備之敵從隍中突入諧與邦直合戰殲其半敵憤恚合左右部落數萬人環七札圍之矢石俱盡援兵不至與邦直俱戰死事聞贈指揮僉事廕一子世襲百戶立祠於陽和賜額曰奮忠 萬曆府志

張恒江都人世襲揚州衛指揮使恒長身廣額負膽畧善談論能拊士卒累官淮揚叅將致仕嘉靖丙辰倭由劉淵犯揚州撫按卽家起之賊薄城而攻恒與千戶羅大魯百戶曾沂率兵禦之賊設伏教場後門以數人挑戰伏發恒與大魯沂皆及於難後賊平以恒非見任官

不以聞萬曆間巡撫白其事始以恒從祀報功祠春秋

與祭

嘉靖惟揚志

王烈泰州人世襲守禦正千戶嘉靖二十三年倭寇通州巡撫鄭曉檄烈往援至黃茅港遇伏與揚州千戶洪岱文昌齡共力戰死之奏聞加贈一級與世襲指揮僉事 泰州舊志

陳輔堯字九室江都人萬曆中舉於鄉令歸善考績以天下第一清官擬授御史旣而改牧膠州有餽山繭者受而懸之公署陞永平府同知甫至任經畧檄赴瀋陽印馬事未竣而遼陷從者諷之急去輔堯曰孰非封疆

臣奚去為引佩刀自刎以死事聞贈按察司僉事諡忠烈建祠於江都西門高邦佐並祀稱雙忠

本傳

高邦佐字以道襄陵人隨父業嵯於揚萬曆二十三年成進士歷官薊州道終養歸天啟初起叅政分守廣寧值熊廷弼王化貞構隙邦佐知事必敗乞歸方報允而化貞棄廣寧走衆謂邦佐可入關邦佐叱曰吾一日未去則一日封疆臣也將安之夜作書訣母策騎謁廷弼請授兵赴難廷弼不納邦佐仰天長歎泣語從者曰松山吾守地當死此汝歸報太夫人遂解印綬自經僕高永亦自經於側事聞贈太僕少卿諡忠節

本傳

高孝鋹字仲達江都人尚書鈐之曾孫天啟丁卯舉於鄉初授豐縣教諭陞信陽知州時流賊橫熾楚豫間歲復大歉人相啖孝鋹竭橐糴穀以賑又晝夜備守禦防不測監司王程恣睢乖戾更置孝鋹所部署命弛備以撫賊孝鋹力爭不得未幾賊舉火登陴城潰孝鋹方率衆巷戰賊已踞州堂矣縛孝鋹逼降罵賊不屈死事聞贈河南布政司叅政廕一子入監崇祀名宦鄉賢

康熙

府志

古道行江都人崇徵辛未武進士慷慨任俠行兵按司馬法以叅將守駱馬湖庚辰寇至道行帥兵禦之戰累

勝後援師不至力竭竟歿於陣

康熙府志

郝景春字自古江都人萬曆壬子舉於鄉署鹽城教諭罷歸起雜職歷知房縣時賊張獻忠等九營就撫郟陽羅汝才屯房東白貴屯房北黑雲都屯房西景春以賊叵測獨請勦上官不聽一日汝才合三營逼房城景春擊之多斬馘上官數以朝命諭景春景春乃單騎入汝才營與結盟信既而獻忠叛穀城率衆圍房縣景春部署其子鳴鸞及僚吏分門守賊掘人墓取棺戴之首以攻城景春於城上然草并投石擊之賊掘城城上以熱油灌之賊立雲梯則設鈎鈎其梯斷之又設銃擊斃數

百人凡五晝夜獻忠欲解去降賊指揮張三錫繼一賊上羣賊繼之城遂陷羅汝才以數十騎擁景春去景春待其子鳴鸞至以手畫其頸曰此下不甚痛吾父子決計死耳汝才從容勸景春降景春勃然曰天下豈有降賊知縣乎於是與其子及僕陳宜見獻忠罵益厲獻忠怒牽景春父子并僕陳宜俱殺之贈太僕寺少卿建祠

江都以鳴鸞附

郝太僕家傳

王道隆字萱生江都人天啟甲子舉於鄉除壽州教諭以端亮範士陞濱州知州治訟明允他邑咸質成焉壬午冬寇至濱陷道隆身被數創慷慨不屈死家屬十餘

口俱被難及櫬歸濱之士民哭送數十里外立祠表其忠

江都縣志

楊廷璧字荆璞江都人以明經授舒城教諭賊張獻忠寇邑璧分守西門語縣令曰子職非守土今日之事義不可辭萬一不守張許吾師也鼓勵軍士嚴守三晝夜矢石皆盡城陷被執罵賊遇害子諸生濟之亦殉父死

江都縣志

倪可大字簡白儀真人少有文名以歲貢授霍邱訓導崇徵丁丑流寇東下急縣令黃日芳適考滿預請以城守屬可大可大概然身任賊圍城督民兵千餘逆戰斬

賊數百級賊少却偵知邑無火備以巨炮攻南門城遂陷可大守北門賊趨執之可大嚼指血噴賊面罵不絕口遂被害妻戴氏與女未笄皆自縊僕倪表亦從死舉家死義者十有一人事聞贈國子監學錄霍人爲立廟

北門外

儀徵縣志

梁于涘字飲光江都人崇徵癸未進士知萬安縣蒞任甫一月大兵下萬安于涘自投於纒家人救之不死又投江爲羅者所獲囚之南昌獄幅巾布袍談笑賦一詩自經死其詩云但知生富貴誰識死功名到頭成箇是方見古人情時家奴梁善杜忠龔明張聰聰婦徐俱

從死 家傳

鄭爲虹字天玉江都人崇徵癸未進士除浦城令擢御史巡仙霞關駐浦城時鄭芝龍盡撤守關將仙霞嶺二百里間虛無一人大兵入閩爲虹亟還浦城縱士民出走自守空城爲我兵所執死之年二十有五僕陳龍亦從死 本傳

王道淑字善長其先豐城人四世遷儀真道淑由恩貢生授金華府經歷陞湖廣按察司經歷雖官微職小道淑節義凜然守城陷以身殉焉其子棫瑞從之闔門俱死 儀徵縣志

李信字吾斯興化人以歲貢授和平令大兵入廣郡縣望風歸附和平邑最小衆憂懼不知所出信意氣自若呼二子泓遠淑遠語之曰死自吾分汝輩乘間速去二子跪泣曰大人死忠兒獨不能死孝乎相率爲守城計邑人懷信恩爭用命城旣陷父子俱被執泓遠縛急而泣淑遠叱之曰吾父子死猶生也何泣爲遂皆遇害 康熙府志

吳明卿字伯亮其先歙人以業鹺家儀真性剛介不屈崇徵癸酉領鄉薦授崇義令縣俗健訟明卿至竟月無差票鞭笞不施日具壺茗坐堂上洞重門聽訟者出入

就質數語折之半載巡按御史以政簡刑清薦於朝會
甲申變扼腕數日不食死長子諸生應蛟隨任適往贛
聞訃亦自經死 儀徵縣志

韓默字文適先世臨汾人家揚州補江都學諸生揚州
城破時默急歸謂妻蕭氏曰吾讀聖人書當守義死不
可苟活若自為計乃易儒巾服襴衫皂絛鞞既肅遂墜
井死長子彥超亦墜井死蕭與女皆自縊另有傳越一
年居人有浚井者出默尸面目如生衣冠整潔惟左手
損一小指左足脫一鞞而已家人伏尸哭左鼻忽出血
人皆驚異乃棺殮以葬焉 土巖異香集

饒餘字吉人江都人性至孝父母歿家貧葬祭不能成
禮每讀書至夜分則哭哭已復讀聞者為之泣下乙酉
城破自縊年三十六先餘聞李自成陷京師慷慨激烈
憤不欲生至是竟死 康熙府志

韓鼎新字煥然江都人以明經授浙江某縣教諭城破
公服縊堂上死 康熙府志

高孝纘字申伯江都諸生城破書衣衿曰首陽志睢陽
氣不二其心古今一致入學宮自經先聖座前同時諸
生王士琇設莊烈帝位泣拜與其弟同縊死邵伯鎮諸
生張映發投井死汪應坤自縊于銓觸石死諸生劉慶

遠投江死指揮高一麟自刎死諸生余颺衣青衿同妻
 某氏對縊死越八日面如生諸生王廷珮同弟廷璉廷
 瑜飲酒從容談笑題壁作大書縊死諸生呂家齊投新
 橋河死王纘字伯綿績字亞綿績字叔綿兄弟三人並
 縊死諸生汪自盤同妻蔡氏投井死醫者陳天拔畫士
 陸愉武生戴之藩義兵張有德市民馮應昌舟子徐某
 皆自盡其餘無姓氏可考者不勝其數

參史藁郡邑志

國

朝董潏字禹門江都恩貢生順治三年隨征福建以功
 授沙縣知縣時閩疆新定潏善撫字百姓安之四年有
 山賊羅某與妖僧米逢年共為亂羅賊來寇沙潏屢出

戰屢敗之賊環攻三閱月不退潏守益堅一日賊攻東
 門潏并力禦東門而逢年誘縣丞黎某開西門納賊潏
 急令其子亦舒壻張思治率家丁五十三人與賊巷戰
 並死焉潏被執罵賊甚厲賊怒叢射之仍割其頭去妻
 葉氏抱一歲孫齎匿民舍以免事聞 贈按察使僉事
 孫長廕知縣歷馬湖知府 江都縣志
 孫之烈字式武江都人武進士官江西都指揮 國初
 調征楚寇至鄱陽上蘭力戰俘馘無算以援兵不至死
 之士人王紳有悼忠歌紀其事 康熙績府志

陳錡字龍臣高郵人武進士初任山海關守備累遷副

總兵時山賊猖獗賊首李來亨結巢溪峒提鎮進兵會
勦命錡為前鋒錡奮勇擒捕以火焚林箐破其四峒乘
勝深入伏發從騎皆沒錡轉戰三日手格殺數百人馬
力不能支乃拔腰劍自刎事聞

賜葬廕一子千總 高郵州志

王相呂字望子泰州人順治丙戌舉於鄉授睢寧教諭
以文行教士士皆懷之適海弁亂攻睢寧城陷不屈死
之


賜祭一壇 贈助教祀鄉賢 康熙續府志

字江屏其先江西新昌人曾祖讓南明進士

後遂占籍儀徵欽鄰康熙辛丑進士康熙戊申授廣西
富川知縣縣新定欽鄰百計撫綏循聲日著甲寅孫延
齡叛兵圍富川欽鄰率親丁鄉勇戰却復至有弁士為
賊內應城遂陷欽鄰巷戰不勝被執罵不屈延齡欲授
之官欽鄰怒擲其印北向拜闕南向拜母作絕命詩曰
反覆南疆遠辜恩逆醜狂微臣猶有舌不肯讓睢陽遂
自縊死事聞 贈卹如例諡忠節 儀徵縣志

孝友

漢董永海陵西溪鎮人少失母獨養父父亡貧不能葬
乃從人貸錢一萬以身作傭葬畢道遇一婦人求為永



妻永與俱詣錢主令織絹三百匹以償甫一月而畢辭
永去曰我天上織女也緣君至孝上帝命我織絹償債
言訖凌空去今丁溪場永與父墓並存西溪鎮有天女

繅絲井

參方輿勝覽諸舊志 按山東省志永西漢千
乘人今青州府博興縣有永墓博興古千乘地

或又云永徙居湖廣德安父歿黃州賣身以葬德安碑
碣可攷豈海陵別有董孝子而歲久傳譌遂傳會為永
耶乃勝覽謂海陵西溪鎮為永故居而孝子祠天女
寺繅絲井皆以永傳故因舊志存之亦傳疑事也

吳奉廣陵人性至孝廣陵守張載舉為孝廉

明南畿志

晉盛彥字翁子廣陵人少有異才母王氏因疾失明彥
不應辟召躬自侍養母食必自哺之母既病久婢使數
見箠撻婢忿恨伺彥暫出取蟻螬炙飼之母食以為美

然疑其異密藏以示彥彥見之抱母慟哭絕而後蘇母
目豁然後明仕吳至中書侍郎吳平本邑大中正劉頌
舉彥為小中正太康中卒

晉書

高悝廣陵人少孤事母以孝聞年十三值歲饑悝菜蔬
不厭每致甘肥於母撫幼弟友愛寓居江州刺史華軼
辟為西曹書佐及軼敗悝藏匿軼子經年會赦乃出元
帝嘉而宥之以為參軍遂歷顯位至丹陽尹光祿大夫

時建昌伯

晉書

南宋劉宗武廣陵射陽人魏大武南伐至安宜宗武母
為亂軍所害宗武蔬食終身人號所居村為孝義鄉

寶

應縣志

五代徐錯字楚金廣陵人與兄鉉相友睦常共用墨一圭弟馬未歸兄馬不肯茹草兄出亦如之鉉以直諫被逐錯思念涕泣至失心其母請於李主曰法有兄弟相罪及今願錯與鉉俱貶以緩其疾李主哀之爲召鉉鉉還而錯病已昏瞽不識人家人反覆告之猶自記兄背有黑痣子發衣驗之遂抱持噬其痣號哭幾至氣絕錯嘗著說文解字韻譜十卷說文解字繫傳四十卷

嘉靖惟揚志

宋沈政泰州人端拱初政父爲屯田院衙官凶暴無賴

使酒毆平人死政中途見父恐懼問其故卽號呼褫衣

故毆其屍巡者捕送官獄具政怡然就死聞者悲之

萬曆

曆府志

朱壽昌字康叔揚州天長人徙居高郵以父巽蔭試將作監主簿歷知閩州鋤姦擿伏郡稱爲神遷知廣德軍壽昌母劉氏巽妾也初巽守京兆母劉氏方娠而出壽昌生數歲始歸父家母子不相聞五十年後壽昌行四方求之飲食罕御酒肉言輒流涕熙寧初與家人辭訣棄官入秦曰不見母吾不反矣行次同州得之劉時年七十餘嫁黨氏有數子悉迎以歸京兆錢明逸以其事

聞詔還就官由是以孝聞天下壽昌以養母求通判河中府數歲母卒居喪幾喪明既葬有白鳥集墓上拊同母弟妹益篤累官司農少卿遷中散大夫

宋史 蘇軾 賀壽昌刺血

寫經求母五十年得之蜀中詩嗟君七歲知念母憐君壯大心愈苦美君臨老得相逢喜極無言淚如雨不羨白衣作三公不愛白日昇青天愛君五十着綵服兒曉卻得償當年烹龍為炙玉為酒鶴髮初生千萬壽金馬詔書錦作囊白藤肩輿簾感繡感君離合我酸辛此事今無古或聞長陵竭來見大姊仲孺豈意逢將軍開皇苦桃空記面建中天子終不見西河郡守誰復譏穎谷封人羞自薦

許俞縣人從父居海陵為胡瑗所知俞事父以孝謹聞供給甘旨晝夜不怠與妻子共食粗糲供父則盡珍異父病篤澣濯衣服必躬親之曰寄於家人之手吾恐

厭怠也胡瑗為作孝子傳

嘉靖惟揚志

張熹字立道海陵人事母至孝家苦貧自絕葷膳而日營甘肥以奉母赤芝生於門越七年又產舍後竹間前後凡十四本光潤如塗丹朱扣之鏗然有聲乃築三秀堂內閣劉既濟為之記侍郎蔣粲筠州守毛敦書皆以詩頌其孝感

萬曆府志

錢渚字申伯海陵人家貧竭力以養母飲食極豐腆母病湯藥必嘗而進居喪哀毀骨立悲動鄰里廬墓三年

嘉靖惟揚志

蔣伍寶應人嘉定間母孫氏兩目俱盲伍自剗左目和

粥以進母母目忽明縣上其事郡守直秘閣應純之賜予甚厚詔表所居曰昭孝坊

嘉靖惟揚志

元袁智周字道濟泰州人世為丁溪鹵戶至正間父敬夫為總催劉正二虐辱死智周誓復讐陰佩刀伺間便凡六年會正二為人所殺乃以刀棄之邗溝州守趙儼

上其事旌之

參梧溪集小傳泰州志 王逢袁孝子佩刀歌鹵豪煮海地沸蒸忽報孝子蒼天崩

披髮誓雲雨若鷹百金一片陰壑冰六年泣血絳雲凝悲風淒淒常夜與妖狐戴醜鬼物憑含沙時干左右眩陸阻習坎渡阻湖歎歌獨漉氣填膺刀亦汝知龍梭騰神鋒寒芒鐔威稜仰號彼蒼奚曹曹斯須須間隙不可乘坐令骨立枯屋藤墓廬青冷松明燈矧有母老髮鬢鬚破涕為笑躬豆登無何讐家死棘荆臭肉厭厭蚋與蠅天其假手俾世懲人生五倫首父子復讐義昭春秋禮見遺刑書著諸史宗元議足垂千祀倒行逆施伍員恥

舞陽古粉同轍軌老涉遲鈍幼超偉固關時命非偶嗟卿被兵家轉徙事往行存宜繕紀醱醢花香鯉搖尾癯然鶴行過客邸欲言復吞髣髴耳婢嫗猶嬰慕焉已酒酣問刀首如七忍歸武庫投邗水水收烟消淨霜葦電光霍霍無時起安得河伯以罇授烈士來丹積冤從一灑 梁寅袁孝子篇袁孝子事死如生欲死海鹽場上淚眼枯哀心無窮海之水誰云猛虎凶誰云長蛇毒咄爾凶毒人何獨無骨肉爾身雖蠶斷腸已裂我腹父也銜冤螻蟻鄉兒猶飲食被服裳皇天昭昭運三光如山之罪胡可以掩藏暑卧埃塵寒卧雪霜狡兔躍我前野狐嗥我傍父魂有知兒共處母身未忍兒身亡嗚呼天下幾人冤且苦孝子三年獨廬墓官書大字表門戶更願除却人間蛇與虎

卜勝高郵人奉母至孝泰定間母病為嘗糞又割股作糜以進母等愈郡上其事詔旌之

嘉靖惟揚志

張緝字士明其先膠州人父宦惟揚因家江都至正間

緝與兄紳弟經同領山東鄉舉緝授泰州幕職棄之養親居揚州十五年揚州兵亂母姬氏方卧病賊突入卧内舉槍欲刺姬緝以身蔽姬槍中緝脇三日而死元史

李茂大名人徙家揚州父興壽臨卒語茂曰吾病且死爾善事母茂泣受命奉母孟氏益謹母嘗病目失明茂

步禱於泰山三年復明又每夕祝天乞損己年益母孟氏年八十四歿居喪哀慟聞者傷之大德九年揚州火

燒千餘家已及茂廬風返火滅事聞旌之元史

張毅泰州丁溪場人元季奉父母避兵大同入明為大同行都司掾以勤幹廉潔著稱性至孝母歿扶輓南歸

道直沽父又歿負骸骨歸葬服除補浙江都司令史

叔客死瓜洲仲叔亦貧老毅時感泣求謁告省募蘇李

叔奉金帛以養仲叔時人高其義蘇伯衡為傳蘇州

舊志

孫質高郵三埭人元末避兵揚城賊張鑑兵入城質度

不得俱免謂其妻曰不幸罹此父母年老我子女俱幼

若使父母殞於兵則抱終天之恨莫若棄子女負親以

逃妻泣而從之遂奉父母奔蘇州後二親以壽終洪武

五年質還高郵會稽楊廉夫為之立傳高郵舊志

明吳汝寧泰州人洪武初伯兄汝陽以鹽事戍雲南烏

撒衛越六年歸里心憚遠行臨發愀然不忍去汝寧慷
慨代兄役行至黃陵廟遇風覆舟溺水死焉其七世孫

吳嘉紀記之以詩康熙府志 嘉紀詩曰我聞洪武皇

宇歲不歇故鄉那得歸耕田海樹烏棲溪月圓烏撒軍

人萬里還盡室驚看如夢寐老親喜極轉潛然骨肉欸

欸重依依不知假期難久延訪舊比鄰方載酒催行里

正已備羈妻子更牽衣雙親齊撫臂頓足仰面向天哭

高天曠日為昏晦就中一弟心中煩呼人寘兄起相代

入門自裹頭出門自束帶軍令不用暫留戀彎弓插箭

隨前隊驅馬渡吳山山溪日落無人行密林峭壁馬蹄

側枝上鷓鴣鳴時一聲慷慨征夫顏色苦開眼不見親弟

兄行行歷楚疆七澤魚龍鄉波濤旬旬氣喘翳回頭數

望爺與娘危檣欲舵望前去黃陵廟前風大狂風狂舟

覆覆壯士逢天殤未把吳鉤舒國奮翻成李樹代桃僵

白骨從此日漂泊閨中延頸復何望君看東海壘殘州

長

張起海陵人父遭兵亂與母相失起晝夜悲泣行求四

方三十年得母於濟陰成廷珪贈以詩比之朱壽昌焉

溱州舊志

王鳳字朝陽寶應人少孤事母至孝母嘗病頭癰潰爛

不可近鳳朝夕奉湯藥手拭膿穢敷洗必親為之母竟

弗起鳳時年十七哀毀骨立既葬廬墓有盜夜入其廬

見鳳容色哀戚曰母驚孝子以所盜他物遺之去墓上

忽生松篁數株日就叢茂人以為孝感所致後仕山東

平度州同知嘗輸租銀於京羨餘千兩歸貯公帑當道

考覈有昔聞孝行今著廉聲之語嘉靖惟揚志

趙岱字謙中興化人父病岱取中衣躬為澣滌母周氏年九十岱日營甘旨以奉之自製樂詞帥子弟歌舞以侑食處兄弟尤友睦恒共被服宗族皆仰以為生

府志

萬曆

周鳳字天瑞儀真人少為諸生後以歲貢主吉安永寧縣簿初父逋客錢被訟逮治追杖垂死鳳誓賣身傭直以救父燕商蘇榮憐之出黃金一斤償客父得釋鳳詣榮傭弗納請質以宅亦弗許竟投券去後榮以他事被誣鳳為力辯獲免榮卒服衰以報人並高其義焉

儀徵

舊志

王沂字本道儀真人正統間有伯父為人所誣謫戍開平天順改元大赦伯未得返沂嘆曰伯不幸受讎吾為猶子顧不能雪之耶乃重趼上疏訟寃竟得釋

康熙府志

徐恩江都西鄉人家貧業農兄弟數人俱析爨恩獨終養膝下父患瘍侍藥餌甚謹日夜吮其患處父死母病痰不飲食者月餘時盛暑恩伏牀下身為蚊嘍無完膚每晨焚香籲天偶一老兵句其門暑著絮繪肘後懸竹筒貯藥恩為母懇一粒大如粟母服之尋愈人疑老兵者仙也母竟以高壽終有司獎之稱徐孝子

萬曆府志

史得儀真人兄能為指揮坐法當死得念兄乏嗣請於

官願以身代爲之荷校者幾十年兄竟出獄生子得喜
曰不負吾心矣會赦並釋人咸異之

儀徵舊志

楊璽字國玠儀真人事其父出入必告晨夕定省不懈
寒暑父有所適必迎於道飲於他所雖夜分必俟其歸
既歸俟寢而後退比其亡也哀毀逾常事母益篤嘗買
易於市日必三返視食入厨滌器其誠如此母或不悅
必長跪自責曰兒婦之罪也母顏解而後起人皆稱曰

楊孝子

嘉靖惟揚志

徐鈇高郵人父濟民早世母劉氏遺腹生鈇母疾篤鈇
禱天請以身代時暴雨如注而香燼不滅人咸異之母

疾尋愈母出鈇必親與僮僕扶輿及卒鈇廬墓三年

郵舊志

魏堯民字欽夫江都人家貧年四十始婚婚時值父病
未幾父歿就苦塊及葬廬於墓三年既歸婦猶處子也
伯兄舜民爲山東驛丞病卒負官錢堯民徒跣二千餘
里走控當道得寬其逋而貧不能昇喪土人憐之予地
以葬堯民痛哭識其封而歸嘉靖間里人聞其行於官
予巾服等諸生復其家

萬曆江都志

栢英江都人延安衛指揮使秉性孝友父卒哀毀幾絕
廬墓三年感狐兔爲侶有司以闕旌表其闕

姓譜

陳璉字廷玉儀直人世業農璉與其兄耕樂友愛甚至
耕樂無子璉始生子抱與鞠之再歲而殤繼與之復數
歲而殤如是者三耕樂不可曰吾弟之子猶子也已而
乃勸卜妾卒無子日夕令子女遠膝以悅其心耕樂晚
年爲江臯六老會絕意家事璉亦喜曰兄之樂吾之志
也怡怡終身士人稱之

儀徵舊志

嚴效字應之江都貢生性婉順事父母能色養有所規
諷雖責逐無悔父母亦悟愛之如初嘉靖初奉詔旌表

授遼東都司經歷

康熙府志

王無江都人郡諸生七歲喪父哀毀如成人長奉母極

孝母病九月不解帶侍母榻左二十餘年母壽百歲比
卒哀毀骨立三年不葷酒有司請爲鄉飲賓辭不赴巡

按御史命旌其門

萬曆府志

顧承學字思敏江都人鎮遠侯承光弟補郡諸生自處
若寒士與兄承光甚友愛承光奉朝請京師承學每思
之輒泣下因往省薦補錦衣居半載乞歸承光嘗奉使
南還躬侍飲食病則煮藥進之其篤於天倫如此

萬曆

府志

孫著寶應人父鸞嗜飲著常置錢酒家令其恣飲父病
氣壅醫云須百蝦蟆納猪肚中食之可愈時冬月著覓

之野中得百蝦蟆里人大異之著曰傷百命以生吾父
吾不忍也乃盡放之自以股肉納豚肚中父食之尋愈
知縣李瓚白於當道旌其門 寶應舊志

白所聞字獻廷儀真人世襲衛指揮使事寡母以孝聞
朝夕必問所嗜寒暑必問所服四十餘年無異一日母
死盡哀骨立由殯以及祭葬皆中於禮撫季弟所見衣
必共笥食必同案萬曆初凡三督漕運後以捍城池卹
軍士有功陞授大河總司上勞績計部卒 儀徵舊志

張仁寶應人自幼寢食未嘗離父母左右既長不娶曰
恐間吾父母也父母既歿復曰無親可養何娶為遂終

其身不娶亦以兄有子能不絕親後云同時楊科蒯源
胡悌並以孝稱直指行部皆給粟帛旌其門 寶應舊志

魏全興化人事母至孝母畏雷全每他出見天欲雨則
顛蹶滿歸夜見有電光雖宿於市廛必鑰門而還抱母

卧終身不忘 興化舊志

桑履直字日鄰江都人萬曆間貢生少孤事母篤孝母
性嚴色微不豫則長跼終日候霽乃起後子捷事履直
亦竭盡孝養農興必請親所嗜卽遠道難得務力致之
友愛兄弟自居敝廬而以新築之舍子弟里人咸以為

履直有子 江都縣志

蕭維堅江都人生而樸誠性至孝父病瘖堅侍湯藥數年未嘗安寢及母病亦竭力焉親逝弟妹俱幼堅撫養成立經營婚嫁之弟婦溫氏早孀撫其遺孤俾得守節及維堅夫婦疾劇子廷瓚後先封股瓚妻病孫日曠割肝以救一門三代篤孝里中未有也日曠另有傳

江都縣志

李思謚興化人少師春芳孫少讀書篤於至性居嫡母喪三年不入內刺舌血寫佛經以報遂茹素終身異母弟思讚幼失恃與同卧起飲食必共案撫愛甚篤年二十九卒所著有春秋纂義懿行類編敦好堂一二集諸

書 興化舊志

龔勳字世臣高郵人九歲母疾隆冬思藕勳禱於神求獲之後貢入太學心動馳歸五日而父卒隱居不仕以壽終今祀鄉賢

高郵舊志

王隲江都人性孝友朝夕侍養其親必致所嗜兄早逝撫其遺孤同己子又嘗出已資助人婚喪周人貧乏里中誦其孝義

萬曆府志

陸典高郵人幼有神童名年十五補州學諸生父龍慊慨任俠時有衛弁侵屯田事敗法當戍乃謂龍曰某罪不敢辭所惜祖宗汗馬勞自我新為泣下龍憫之即挺

身代任其罪謫戍遼東毅然不返典時年少抱痛無如
何隆慶初遂發憤出塞求親而計適至悲號躡屩奔喪
塞外欲扶櫬歸里而法不得入關乃徒跣京師泣陳於
當道薊督王某檄護之歸舉明經授常寧令以忤上官
改府教授不之任終於家修郵志十二卷 高郵舊志
任材興化人父患背疽勢甚惡醫莫能療幾危材禱神
而吮之得膿數升而愈事繼母曲盡孝養鄉人稱之 興
化縣志

楊守業江都人事父槐母張氏曲盡孝謹母病藥餌親
嘗不解衣卧起者浹旬後病日篤醫不能治業日夜

天號泣母一夕忽愈衆以爲誠孝所感踰年母歿業擗

踊哭絕者數四家人救之甦勺水粒粟不入口越旬而

死有司旌其門

萬曆府志

孫諫高郵人父嬰寒疾諫割股食之而愈繼又病疫割

右脇出肝寸許飲父父立起創久不愈有神人至門以

藥傅患處卽無恙里中驚爲篤孝所致巡撫李三才給

以金令有司以粟帛存問

康熙府志

倪本燹儀真人崇徵丁丑父可大爲霍邱訓導城破罵
賊死母戴氏方雉經賊將取其手釧以刀斫指指盡落
本燹先已匿免聞之痛呼奮出以身翼蔽母身中三十

餘創僵仆衆屍中賊去復甦刀瘢如縷

儀徵縣志

國朝陳嘉謨字我師興化諸生七歲失母嘔血成疾事繼母以恭謹聞順治初嚴禁私鹽猾吏構鹽徒爲黨妄株大姓破其家嘉謨父弘道張酒肆城東羣盜入飲指畫授計數側目之未幾事敗詞連弘道嘉謨赴縣自明因窮詰其黨與賊大恨遂誣弘道造舫船通海與其弟弘猷俱繫府獄賊黨日夜謀殺之胥吏索賂累百金嘉謨欲一見父不許詣賊所請以身代賊交口唾詈毆之見血獄且成嘉謨痛哭於城隍之神乃作血書置袖中出廟去是夜其僕獨卧邸舍三更聞哭聲且叩門甚急起

視無所見大怪之及明當事有傳家書至署者啟封則嘉謨所作血書也曰父死子亦死徒死耳無益死於今猶可明父冤誠得鋤奸暴安善良嘉謨死不恨當事大驚令求尸不得越七日髮上指屹立城外官河中脫其父叔於獄收葬嘉謨而盡殺賊黨

康熙府志

方立禮字武城本歙人遷江都父伊側室魏氏子也八歲魏卒繼母汪氏有二子曰立化立乾愛之惡立禮汪性嚴酷每怒輒與大杖立禮受杖惟謹一日提甃傷立禮幾絕及蘇無變容年十八父卒汪益逞逐立禮立禮時時候門外問母起居欲入不敢低首淚暗下汪疾則

憂懼不食日夜奔走戶外少安乃已妻洪氏孝謹如立
 禮日受鞭撻無違色不使立禮知歲乙酉汪及立乾俱
 死立禮哀毀骨立立化亦早歿子女婚嫁喪葬立禮皆
 已任焉明崇徵間用宦者王坤督鹺立禮伏闕上書言
 不便狀為通政所格雍正六年題 准建坊旌表 參雷
 士俊王巖傳狀

金玉節江都廩生乙酉 大兵下揚州時親歿未及葬
 玉節穴室中地瘞之封未完城陷一卒至疑所瘞者金
 也將斫棺玉節匍匐伏棺大呼以身翼之復跪守十穴
 八晝夜得免子奇選彥選皆諸生亦孝友父子俱祀鄉

賢 江都縣志

郝明龍字雲蒸江都諸生明末父景春殉難房縣明龍
 號慟走戎壘中扶喪歸葬又北走上其事得卹典及廕
 乃念父死事之慘麤衣蔬食絕意仕進至九十四歲終

孫旭光拔貢生 江都縣志

蔣垣字次斗江都瓜洲人歲貢生順治二年 大兵至
 瓜洲人皆避去垣方十一歲父母俱卧病屬族人攜垣
 去垣呱呱親側日侍湯藥不忍離兵見而憐之全其家
 既長讀書敦行以儒學擅名一時遊其門者多致通顯
 子承慶歲貢生 江都縣志

張汝化儀徵人母徐氏卧病不起汝化延醫不效欲取
肝啖母乃懷利刃跪神前自刺其胸血流仆地幾絕鄰
人奔救急以麻縛之移時始甦母聞驚汗疾遂解若有
默相之者母子皆全里人異之

康熙府志

金志堅字貞吾高郵人七歲事母盡孝道每食必具甘
旨親上食飽乃退晨昏造榻前問安否或白外歸至
漏下數十刻必伺於寢門之外親歿後每逢祭日終夕
慘然執爵灌奠伏地嗚嗚不能起教人嚴而有法博極
羣書所纂錄甚多咸有凡例可觀子相玉庚戌進士

郵州志

蕭日曠江都人幼有至性母朱病篤日曠炷香告天自
剖其肝始剖之不得再剖之乃得肝二片而脇下洞開
露見五內天將曙日曠危坐燈下血滿衣裾手持其肝
令婦俞氏和藥以進母猶戒婦勿洩母服之瘳日曠創
甚殞焉年二十六時康熙七年六月四日也里人感其
孝立祠梅花嶺祀之

江都縣志

人子剖股割肝抉日

以療親疾是以親遺體行殆非孝
之經也顧如蔣伍卜勝孫諫張汝化蕭日曠之行孝雖
愚而情可憫亦何忍概沒之爰因舊志所傳錄而存焉
其餘則各書名於後以
警世之熱視其親者

張中達字九達江都歲貢生幼孤事母最孝先意承志
織細必周母好潔每日為母滌拭踰器生二子後即不

復入室冬夜曲卧母足後母或遣之泣曰母氣衰非兒
不暖母病篤嘗糞以希其愈子庸德戊午副榜亦以孝
友稱嘗哭父病日哭母日加昏再哭弟遂失明著有四
書尊註會解行世 江都縣志


張京字羅萬興化人七歲即知孝養願減己算以益親
年父母歿畢世哀慕久而不忘撫育弟妹皆能成立遇
親族周貧濟困不遺餘力屢奉檄旌表其門 興化縣志

李元健江都人少有聲諸生間尤篤於孝友母年八十
病雖矢遺必躬自浣濯孺慕之色終身不改與兄弟備
極友愛鄉人咸重之 康熙府志

趙蔭雄江都人生稟至性母薛氏抱沉疴蔭雄年十八
見醫藥罔效遂齋沐絕粒長跽泣禱於天願減己算以
延母年母病方愈蔭雄尋得疾不起里人哀之 江都縣志

張廷樞字天木高郵諸生少失怙孝事孀母以賣字錢
供母甘旨嘗遊學虞山心忽怛怛動聞武安王廟中籤
著靈往祈之道者詳解日當速歸能三日抵家母子始
獲面時暑雨滄沒道塗舟行風又逆廷樞徒步行泥淖
中日百二十里如期而歸母果病頸疽膿不得出廷樞
以口吮之乃獲痊所著有寄庵詩集孫夢鯉郡廩生曾

編州志 高郵州志



宋飛雄高郵人少讀書事親至孝父逝停柩未葬母病卧牀十年飛雄朝夕奉事惟謹忽雪夜聞母房火起卽赤身奔抱母出母幸未沾火而飛雄皮膚已焦灼矣又見火逼父柩卽身赴雪中滾濕長號躍入火中赤手撲救火雖稍滅而飛雄遍身糜爛死時肌膚脫落猶呼曰吾父母無恙吾何恨乎其勇於死孝如此知州張德盛旌其門

高郵州志

王賓字仔園江都人能文善書法康熙癸卯舉於鄉歲壬戌赴禮部試試竣聞父訃血淚迸下客往弔不能發一語惟兩手據地目直視髭髮竦豎晝夜哀號水漿不

入口者五日而卒

江都縣志

程願學字與若儀徵人祖死於法父徙寧古塔願學以幼免成童以後思其親日夜泣爲諸生不交一人有延爲師者往教焉自食於家雖杯茗無所啜屏除酒肉并不啖菜果每食亦未嘗飽粗糲免飢而已冬月則忍寒不衣綿纊終身以喪禮自處年六十而卒臨終戒其子勿與妻合葬以不知其父骸骨所在也里人稱之曰苦行先生私謚曰貞孝

儀徵縣志

俞士瑄字宣玉甘泉人天長籍歲貢生年十二侍母病口承其唾母歿哀毀骨立及長父病顛天請代瀕危獲

痊後父歿泣血三年身不入內口不如輩寢苦枕塊皆按禮而實踐之奉生母色養逾至生母歿喪葬盡禮一如其父與母焉生平孝敬篤篤里人信服之康熙四十四年題 准建坊旌表 江都縣志

李棟字吉士興化人住高郵明少師春芳五世孫天性孝友八歲失怙弱冠與弟棫先後補諸生橫經講授者三十年所得館俸悉奉母區給織毫不入妻子手且稟母曰弟子女多用宜倍勿與兒均康熙壬午中順天鄉試座主房考皆稱其文行卓絕今之會閔為延譽公卿間名重一時無何卒於京邸當路賢士大夫哭泣相弔

歛賻以歸其喪棟著述甚富工書畫子炳且中乙未進士 高郵州志

成原正寶應人年十七母張氏得羸疾原正五割股肉以救朝夕坐卧榻下母食斯食母寢斯寢湯藥必嘗而後進及母疾篤勺飲不能入原正以口度米湯逾十晝夜母歿原正哀毀骨立蔬食水飲號泣哀思歷三年如一日因致疾身亡鄉里惜之 寶應志稿

黃展字慕渠泰州人性孝友家貧歲儉母臧氏元夕浙米掄屑為粉團展見之日年饑可省也母因止踰年母歿展遂終身不食饗見之輒流涕輟餐竟日待子姪慈

愛如所生每秋成糶穀得金或就手攫之桁上衣無常
主徑取服去辰皆不問也常云人惟循理安命事親課
子外少有他營便屬分外非士君子素位之學矣
康熙續府志

高成琦字軼韓江都諸生父以罪流三原母抱病不能
起成琦每歲徒步三千里省父歸又負米養母一日父
潛歸江都復還流所成琦侍行途中無貲驢費輒負父
以行足裂流血及歸未久父歿成琦晝夜哀號乃抱父
木主投義濟橋下死
江都縣志

陳包見高郵黃蕩橋乞者每乞食先以供母得米飯

以進已不敢嘗預為母乞棺木人皆感而厚施之母死

每日必乞以祭於墓
高郵州志

孝行附錄

依萬曆府志所載參以康熙府志及各州縣志增錄之

明蘇應芳

諸生

胡易

崔一鳳

儒士

華時叙

諸生

李承蔭

指揮僉事

趙聚奎

諸生

王自強

胡澇

李相

汪有誥

華時中

蘇眉鍾

朱蕙

陳世雍

崔上言

宋朝臣

宋朝卿

俱江都人

萬應徵

李恂

徐文明

葉明

沙稷

孔貞選

侯新

陳嘉試

李鵠

李毓

柳璫

經世緯 詹鍾吉 殷王友 殷湯達

金湯 江應全光祿署丞 趙文炳 汪道宏

周文顯俱儀徵人 張効先 華梓 馮守業

吳宗祐俱高郵人 朱永壽 潘夢龍 王與立

禹萬節 任性 袁晟 沈永

李宗甫 趙忻 陸權 楊縉 魏應周俱興化人

徐霖 陳思敏 解謙 孔學文

萬中英 李廕 錢誼 宮景隆俱泰州人

繆好直 劉光宁 車映昌 仲儀

汪恕 汪源澍 蕭維基 倪成三

史大生 吳兆麋俱江甘人 程桂生 董世榮

路之鼎 任三俊 陳夔 宮於庭

詹宗祥 錢尚志 湯名揚 經一儒

陳國柱 戴士誠 劉繼漢 張翀俱儀徵人

胡傲 楊三策諸生 陳文憲貢生 劉延禧

侯建 車象歲貢 林紹榮 宋長春諸生

宋學龍俱高郵人 李國楷 王紹卿 徐際明

徐燿 李灃俱興化人 范峒 吉琳俱寶應人

割股附錄 皆嘉靖萬曆康熙府志及各州縣志所載 人物孝友

宋吳汝明 儀徵人

明王 輅 趙宗普 趙天澤 林中馨

林中喬 俱江都人 詹大全 徐光裕 王維亮

王國輔 江九萬 俱儀徵人 費 廙 張 佛

王維慶 姚 輔 高之榮 孔應試 俱高郵人

周 溢 泰州人

國朝高 策 武進士 閻士彥 周之藩 黃士誠

李之瑀 黃 琮 汪三才 管士俊

朱呈祉 吳士俊 金天錫 胡宗安

余 鏞 梁 崇 寧宗越 史行義

程國柱 蘇汝爵 蘇汝祿 蘇汝顯

吳 遂 八歲 陳 道 諸生 郝玉三 九歲 史 璜

藍鍾華 金維良 十二歲 江 晉 十三歲 王 詢 俱江甘人

李應婁 吳廣杰 張兆璉 劉駿烈

王定全 王 鏞 殷 趙 王尚宗

王家珍 吳 欽 國學生 卞玉振 俱儀徵人 劉夢舉

徐應熊 邱 雯 葉 令 王士芳 俱高郵人

朱有恒 朱自明 解良弼 顧有義

石 璋 徐士貴 劉允祚 王元曾

王嘉爵 俱興化人 袁懋良 楊 江 王 相

蔣承龍 朱雲龍 陳秉憲 楊日藻

高 琰 吳應裕 沈 江 徐九章 俱秦州人

吳 燾 吳 燾 主 燾 葉 令 王士芳 具高

王 全 王 灝 趙 猷 王尚宗

李 觀 吳 觀 趙 猷 隆 猷

藍 軫 華 金 軫 吳 軫 王 軫 王 軫 具甘人

揚州府志卷之三十一

人物 四

儒林

宋喬竦字立之高郵臨澤人教授州里倡明孔孟之教

從遊者多以文行知名一時淮南數千里間其視高郵

若齊魯孫龍圖覺亦其徒也卒贈朝奉大夫 高郵舊志

馬永卿字大年高郵人大觀元年進士初赴永城縣簿

外家張氏諸舅命其求教劉待制元城永卿到任即上

謁元城問王鞏安否蓋定國時居於郵也永卿答曰王

學士安元城因謂永卿可教曰後生不稱前輩字此為

知禮永卿自是日造其門所與問答莫非粹言要論皆載所撰元城語錄中後永卿官終左朝請大夫

萬曆府志

堯允恭字克遜海陵人景定咸淳兩領鄉薦宋亡專意經傳邃於易深得性命之理江浙行省兩檄充濂溪東川書院山長允恭皆不赴安貧樂善學者多從遊自號觀物老人大司農燕公嘗稱其古心絕俗清氣逼人

詩文二十卷 嘉靖惟揚志

明陳濟字用人儀真人好讀書尤善於易嘗言人當見無始之始而度乃貞周孔本色爰象間如將見之若潮流討源義文固一以貫之也弘治壬子舉於鄉授禮部

登仕佐郎轉戶部差權北新關課粗足餘舶除上料外皆不稅公事暇但焚香讀易每告歸初武宗南狩廷臣莫敢阻濟執簡伏奏者七每奏必廷杖七奏七杖皆竟七晝夜堅跪不起其剛毅如此善筮預知死期臨終著六訓曰儉以養廉勤以勵鈍恭以生義靜以抑煩和以濟方晦以保名命子孫世守之

儀徵舊志

王艮字汝止泰州人少從塾師受大學章句家婁甚弗能竟學弱冠父使治商往來齊魯間已又學醫皆弗竟嘗過闕里觀孔子廟及諸大儒從祀太息曰是聖人者可學而至耶歸取孝經大學論語日誦讀置書袖中逢

人質疑有所得必見之行父應役於官晨起以冷水盥
 良痛自責請代父役晨昏定省禮益虔居久之如有所
 悟所至與人講論道學武宗南巡內官以上命捕鷹過
 海上所至騷動良詣之諭以理義璫矍然起敬因勸以
 請上旋蹕毋馳騁以安天下內官感悟去良聞王守仁
 講學豫章往謁執弟子禮受其學遂至京師復遊吳越
 而歸益斂圭角就和坦自鄒守益湛若水呂柟歐陽德
 咸重之從遊者日衆巡撫劉節御史吳梯俱疏薦亡何
 疾卒本傳 按良為守仁高弟講良知之學名震四方後之論者謂其陽儒陰釋背於朱子數指擊之乃其行誼要不失為學者

王襃

名山藏泰州志俱作瑩

字宗順泰州人良次子也九歲隨父

謁王守仁士大夫會者千人守仁命童子歌多囁嚅不
 能應襃意氣恬易歌聲若出金石守仁曰吾越中無此
 兒也奇而授之學踰十年歸娶已復之越八年父歿襃
 望目隆四方聘以主教者甚多襃不煩繩削動應矩矱
 非其義千金至前不一盼也喪祭必尊古禮建先祠置
 祭田月朔率子弟致奠考其一月中所為竟日乃罷敦
 孝悌睦宗族關於行誼者毛髮必謹中丞凌儒疏薦於
 朝將召用襃堅臥不起未幾卒其門人稱東崖先生

康

朱逸良同里樵夫也易麥糲擇精者供母親其糲秕以
樵一日過良闕行吟曰離山十里薪在家裏離山一里
薪在山裏良謂其徒曰小子聽之人病不求耳逸因附
牆竊聽講論聽訖樵去以爲常良弟子宗姓者顧謂逸
曰諗子雅志甚苦願奉數十金爲子生理免樵作勞且
得日夕相從商切幸甚逸曰子非愛我力却之名山藏
韓貞興化人世業陶日不涉書史而慕聖賢之學聞王
襲講學海濱往從之遊家貧裹麥麩數升俟諸生罷饌
就其餘爨煮食之常曰道在堯舜堯舜只是孝弟遂躬
行力踐言動不苟後自設教遠近來學者數百人有訛

餽遺一切謝絕家無儋石稍餘卽分給貧乏督學耿定

向與語性學大器重之其門人稱樂吾先生

興化舊志

名山藏云貞三十尚鰥同學曠金爲婚旣娶出婦篋
中裙布分給所親與約曰吾不梁鴻非若夫而不孟
光非我妻所至誨誘人善良者以千數每秋穫畢羣
弟子班荆趺坐論學數日興盡則拏舟別聚徧講如
前舟中與弟子賡唱互詠自得也

沈珠字汝淵江都人中正德丙子鄉試卒業南雍從祭
酒漑若水受其學授永新令頗著異政陞南京國子監
丞告歸初若水徒滿四方而珠爲都講迨老益洞其旨

時人宗之稱艾陵先生

萬曆府志

許繼字崇志儀真人以明經貢於鄉八上春官不第繼少不羈長折節務學篤志聖賢之道舉止凝重嘗言君子之學在修德檢身而科舉不與焉在太學司業羅欽順奇之曰非凡器也王守仁湛若水並聞而重之平居閉門靜坐與人講論言簡理該人莫能窺其際其學以收斂身心力行爲本不務訓詁詞章

儀徵舊志

葛澗字子東其先鳳陽人父欽徙江都欽嗜古書構樓五楹藏書數千卷至澗益至萬部江淮間稱積書多者無如葛氏澗博學有名理坐臥一樓手一編寒暑不廢

嘗撰本朝人物編始洪武迄嘉靖人爲列傳甚悉少從

湛若水游德器深粹士林稱之

萬曆府志

張懋勳字堯光江都諸生性嗜學鍵關兀坐者三十餘年自謂於理學有得所著有二劍齋日編及心學正統等書

康熙府志

林之翰字爾憲直州人幼孤嗜學坐臥處皆書隨處體認天理六字以自警萬曆庚子舉於鄉習與鄒南臯徐匡嶽潛心討論又於卑中文山祠創建學會四方士多聚講焉天啓三年除江西寧州守有巨族以毀婚構訟久不決翰諭以正理卽罷訟學使檄視諸生三十人翰

力爭之皆保全州民盧元洞山居僻險不易勾攝州人
訟以謀反監司檄翰往勦翰察其誣開誠宣諭令元洞
赴監司自訴誣乃白初寧民逋賦善匿官於試日責童
子償逋以是與考者少翰盡召之考皆謂翰爲儒吏云
翰篤孝因母亡哀毀病劇卒著有龍沙會語澹臺祠證
學等編

儀徵縣志

李尚華字實夫儀真人年二十學舉業不成去而學賈
三十尚居市肆貿易一日忽爲王心齋木主祀之冠履
衣服皆務與心齋製合欲徧覽古人書先讀孟子讀不
竟不治他事不熟則向心齋主跪讀竟日不起或自扎

其頰其治孟子瀏覽諷誦一日中卽辦數千言又或窮
數日之力治一二句至浩然塞天地日樂哉日月之經
於天江河之行於地有如是氣矣自是經籍百家無不
洞達出而遊學四方同學慕之有以制科勸之者微哂
不答徐而曰恐不如斯道之樂也作精一篇誠其子

儀徵縣志

孫兆祥字肖卿高郵人弱冠補諸生督學御史熊廷弼
奇其文天啓間魏忠賢秉政楊左周魏諸正人皆被殺
作禾已黃之歌見志遂不復應鄉試潛究濂洛關閩之
學入其堂與作格物論明善論又著天論子臣心鏡諸

揚州府志 卷之三十一
篇生平服隨處體認天理六字子入小學卽鑄爲篆令佩焉崇徵丙子以歲薦當謁選聞流寇入中部作詩傷焉遂不赴尋卒後以子宗葵貴贈奉政大夫

高郵州志

國朝朱澤雲字湘淘寶應諸生初依程端禮讀書分年日程刻苦誦習後精玩朱子文集語類諸書有契於心卽循此用工反身體驗隨事省察無不貫徹凡所發明實足爲朱子羽翼至於辨析陸王皆粒破銖分毫無含糊杜門靜守不求人知而當事多高仰之會

天子詔舉賢良直隸總督何世璜劉師恕欲交疏薦其行誼先具書幣招之澤雲臥疾不赴尋卒於家所著有朱子

聖賢考畧十卷詩文經說語錄雜著共二十卷

寶應縣志

志澤

文苑

漢陳子迴顏方俱廣陵人與王充同時充稱之爲班固楊終傅毅之徒文辭斐炳賦象屈原賈生奏象唐休谷永當今未顯使在百世後則子政子雲之黨也

見王充

論衡

徐淑字伯進廣陵人寬裕博學習孟氏易春秋公羊傳禮記周官善誦太公六韜交接英雄常有壯志官度遼將軍有名於邊子璆仕至太常卿

謝承後漢書

揚州府志

卷之三十一

人物文苑

七

嘉靖志云淑隨父慎在京師舉茂才除渤海令遷琅
琊都尉

三國陳琳字孔璋廣陵射陽人初爲何進主簿進欲誅
宦官太后不聽進乃召四方猛將並使引兵向京城欲
以劫恐太后琳進諫曰易稱卽鹿無虞諺云掩目捕雀
夫微物尚不可欺以得志况國之大事可以詐立乎今
將軍總皇威握兵要龍驤虎步高下在心以此行事無
異鼓洪爐燎毛髮但當速發雷霆行權立斷而反釋利
器更徵他兵倒持干戈授人以柄祇爲亂階耳進不納
竟以取禍琳避難冀州袁紹使典文章爲檄討曹操袁

氏敗歸操操謂曰卿昔爲本初遺書但可罪狀孤而已
何乃上及父祖耶琳謝罪操愛其才不咎以爲司空軍
謀祭酒管記室軍國書檄多琳作也徙門下督卒始五
官將丕及平原侯植皆好文學琳與王粲徐幹阮瑀應
瑒劉楨並見友善合孔融號建安七子

魏志

典畧曰琳作諸書及檄草成呈操操先苦頭風是日
疾發臥讀琳所作翕然而起曰此愈我病數加厚賜
皇象字休明廣陵江都人幼工書時有張子竝陳良甫
能書良甫道而子竝峻象斟酌於間甚得其妙一時善
書者不能及也官至侍中青州刺史人謂象章草入神

八分隸入妙篆入能建業有吳時天發識及吳大帝碑
在江寧府皆象書也 吳志

衛旌字子旗廣陵人避難江東單身窮困淮陰步騭與
同年相善俱以種瓜自給晝勤四體夜誦經傳旌後官
至尚書 吳書

華融字德蕤廣陵江都人祖父避亂居山陰葢山下時
皇象亦寓居山陰吳郡張溫求就象學欲得所舍或告
溫曰葢山下有華德蕤者雖年少有令志可舍也溫遂
止融家與朝夕譚講溫後為選部尚書乃擢融為太子
庶子遂知名顯達融子諝黃門郎諝子諱晉秘書監 吳志

宋顧紳廣陵人永初二年二月駕幸延賢堂策試諸郡

秀才揚州顧紳豫州殷朗所對稱旨並以爲著作郎 萬

曆府志

梁高爽廣陵人工屬文齊永明中贈衛軍王儉詩爲儉
所賞及領丹陽尹舉爽郡孝廉梁天監初歷官中軍臨
川王叅軍出爲晉陽令坐事繫治作鑊魚賦以自況其

文甚工後遇赦免頃之卒 梁書

唐曹憲江都人任隋爲祕書學士教授數百人公卿多
從之遊尤邃於小學自漢杜林衛宏以後古文亡絕至
憲復興煬帝令與諸儒撰桂苑珠叢規正文字又註廣

揚州府志 卷之三十一
雅學者推其該博藏於祕書唐貞觀中揚州長史李襲
譽薦之以弘文館學士召不至卽家拜朝散大夫當世
榮之太宗嘗讀書有奇難字輒遣使者問憲憲具爲音
註援驗詳復帝咨賞之卒年百餘歲 唐書

公孫羅江都人官沛王府叅軍無錫丞曹憲以梁昭明
文選授諸生羅與魏模李善相繼傳授其學大行羅有
文選註文選音義 唐書

魏模江都人武后時爲左拾遺師曹憲傳其文選學與
公孫羅李善並稱 唐書

李善江都人雅行博學淹貫古今人號爲書籠顯慶中
累擢崇文館直學士兼沛王侍讀爲文選注六十卷敷
析淵詳表上之賜賚優渥除潞王府記室叅軍轉祕書
郎乾封中出爲涇城令坐與賀蘭敏之善流姚州遇赦
還居汴鄭間教授諸生多自遠方至傳其業爲文選學
唐書

奚陟字殷卿江都人少篤志羣書擢大曆進士第又舉
文詞清麗科授弘文館校書郎仕至吏部侍郎卒贈禮
部尚書世謂陟善於其官智足自處嘗與柳宗元父爲
友見宗元先友記 趙鶴郡乘

王紹宗字承烈江都人少勤學徧覽經史尤工草隸家

貧傭寫佛經以自給每月自支錢足即止雖高價盈倍亦即拒之徐敬業起兵揚州聞其高行徵之不起事平則天召至東都擢拜太子文學累補秘書少監紹宗性雅澹以儒素見稱當時朝廷之士咸敬慕之卒於鄉里

舊唐書

李該字彥博廣陵人學無不通尤好地理圖志患其門類繁多文辭浩博乃會源流考同異勒成一家之說作地誌圖凡禹蹟所窮漢譯所通莫不備載呂溫藻翰擅一時於流輩少所推尚從該遊獨久稱其為博達之上

嘗為該序地誌圖云

萬曆府志

五代馮延巳字正中廣陵人以文雅博瞻稱南唐時授秘書郎歷官至左僕射同平章事延巳工詩雖貴且老不廢識者謂有元和人氣格卒諡忠肅

萬曆府志

馬令南唐書云元宗樂府詞云小樓吹徹玉笙寒延巳有風乍起吹皺一池春水之句皆為警策元宗嘗戲延巳曰吹皺一池春水干卿何事延巳曰未如陛下小樓吹徹玉笙寒元宗悅

宋潘閔字逍遙江都人嘗居洛陽賣藥暇日負囊騎驢看山行吟隨意所適終日弗返好事者繪為圖至道初有言其能詩者召見崇政殿賜進士及第授四門國子

揚州府志 卷之三十一
博士後坐盧多遜黨變名姓緇服入中條山嘗題詩鐘
樓句奇崛僧疑而迹之逸去朝廷捕治急闕出首謫信
州移太平結廬瀕溪吟咏不輟詩苦淡清勁劉放謂其
不減劉長卿 姓譜

崔公度字伯易高郵人口吃不能劇談而內絕敏劉沆
薦茂才異等辭疾不應用父命補三班差使非其好也
益閉戶讀書歐陽修得其所作感山賦以示韓琦琦上
之英宗卽付史館授和州防禦推官以母老辭英宗召
對延英殿進光祿丞遷崇文校書刪定三司令式元祐
紹聖間歷兵禮部郎中知潁潤宣通四州直龍圖閣卒

所著有曲轅集四十卷詩賦百篇

宋史

秦觀字少游高郵人少豪雋能文舉進士不第見蘇軾
於徐州爲黃樓賦軾以爲有屈宋才介其詩於王安石
安石亦謂其語似鮑謝軾勉以應舉爲親養始登第調
臨海主簿蔡州教授元祐初軾以賢良方正薦於朝除
太學博士校正祕書省書籍遷正字復兼國史院編修
官紹聖初坐黨籍出通判杭州御史劉拯論其增損實
錄貶監處州酒稅使者承風旨伺其過無所得則以謁
告寫佛書爲罪削秩徙郴州繼編管橫州又徙雷州徽
宗立復宣德郎遷至藤州出遊華光亭爲客道夢中事

索水飲水至笑視之而卒先自作輓詩語哀甚有淮海文集共四十卷觀長於議論文麗而思深及死軾淡惜之弟覲字少儀覲字少章皆能文子湛字處度亦以文名參宋史高郵州志

仲并字彌性江都人紹興進士歷光祿寺丞終朝請大夫淮東安撫司叅議幼好學強記每一展誦終身不忘其母嘗屏所觀書几上惟臺曆一冊明旦默記吉曜凶煞纖悉不悞及長潛心問學力排王氏一偏之說唯六藝孔孟是師爲文閎肆而關鍵整密所著有浮山集卅六卷嘉靖惟揚志

陳造字唐卿高郵人年踰二十直院崔大雅奇其才勸以求仕初調繁昌尉旣分教姑蘇范成大見其詩文曰唐卿亦高郵人使遇歐蘇盛名當不在少游下尚書尤哀得其騷詞雜著手之不置尋宰定海倅房陵攝郡事皆有最績兩爲試官亦稱得人官至淮浙安撫使叅議晚年自號江湖長翁有詩文雜著四十卷萬曆府志

艾晨字孚先真州人登崇寧二年進士授杭州仁和縣尉政和六年試宏詞中一等明年擢祕書省校書郎兼編修六典文字一時同館若汪藻何臬胡松年孫覿皆當時名士咸見推許未幾補外歷倅隰豐越三州所至

有聲終考功員外郎 嘉靖惟揚志

元龔璠字子敬高郵人善屬文工書有晉人風格憲使

舉和靖學道兩書院山長官寧國路儒學教授調宜春

丞以江浙儒學副提舉致仕後寓家吳門所著有存悔

齋集 嘉靖惟揚志

明李鴻漸江都人洪武初由文學徵仕至刑部尚書明

初辟薦由人材仕者江都計二十餘人惟鴻漸以文學

見徵當時榮之 萬曆江都志

陸顥字伯瞻興化人明初由明經為禮部員外郎兩使

朝鮮不辱朝命得專對之體方孝孺有送顥使朝鮮詩

康熙府志

方孝孺詩天命聖朝建極寧民乃生髦士

以備庶臣或才或哲或肅或敏或勤於遐或事於近維

祝獻甫孔敏且溫伯瞻氏陸秀達而文獻也在朝自我

先皇開廐郊牧職馬之良瞻嗜古訓習禮慎言國典官

儀既飭且嫻維彼朝鮮易姓東海自皇祖世於今二紀

厥父得國伯子嗣之伯也善讓惟弟之貽爰來請命以

定其位帝綏以德俾弗震懼藩臣稽首天子聖仁豈臣

之私念此遠民訓以爰倫錫以爵命璽書煌煌恩禮交

盛載修貢篚良馬先之奔走來庭天子賢之乃命政臣

朝鮮甚忠匪直也忠克順克恭命瞻與獻爾其予使曷

勸其忠發幣往賜藩臣之父之兄之弟之姻之戚陪臣

大吏咸錫良幣以示寵嘉使乎將命崇重而華蔚彼東

藩士多才詣勿縱辯言惟誠是與誠斯動物公乃勝私

廉以服眾智以察微理義是憑人罔不化術以欺人

將汝詐明明天子聖德宣融照臨八表如日之中誰謂

國遠靡有不燭視彼要荒無異甸服管蔡構難東征三

年昔有越裳今也朝鮮軍國所資中土攸之效爾馳驅

節俾遺闕滄海茫茫沮水悠悠往厭纖緝歸思重裘龍

節丹英往餞東闕式遘其征匪逃茲別天步清夷海宇

晏平羣生胥樂懌我皇明我其望之匪遠孔邇勗慎今

猷歸受
多社

石光霽字仲濂泰州人洪武十三年舉明經官學正進

博士作春秋鉤元能傳張以寧之學 明史稿

張源湜字仲源高郵人有文才洪武初由儒士授都督

府斷事尋擢監察御史出知辰州過武昌黃鶴樓賦詩

為時傳誦所著有樵歌集 高郵舊志

撒祥字致和高郵人聰明強敏過目不忘永樂戊戌與

董璘同成進士自以學不如璘誦讀如諸片不輟竟以

積勞成疾卒祥尤善詩雄渾蘊藉後散佚所存斷簡殘

篇膾炙人口 高郵舊志

蔣忠字主忠儀直人徙居句容有詩名與長洲劉溥鄒

亮等列於景泰十才子 明史稿 按儀徵志云名主忠

字存恕有兄名主孝字務本所

著有樵林摘稿少以無題詩得名主忠亦以芙蓉

詩見知於世兄弟俱在十才子中與史稿小異

陶成字懋學寶應人成化辛卯舉於鄉才思橫發善繪

山水花草人物工詩篆隸亦喜古學士程敏政見之稱

為才子名公卿皆禮敬焉嘗自京師出居庸踰上谷入

雲中訪古戰場所至爭延禮之然性疏爽不可掣繫雖

甚相好不易得其詩畫 萬曆府志

朱訥字存仁寶應人成化丁酉舉於鄉授鄆縣令鄆有

揚州府志 卷之二十一
改江陵歷三邑皆著惠政所著有江陵集訥少工詞翰
以白燕詩知名於時 寶應舊志

王磐字鴻漸高郵人有雋才好讀書灑落不凡惡諸生
之拘攣棄之縱情山水詩畫間尤善音律度曲清灑每
風月佳勝則絲竹觴詠徹夜忘倦性好樓居構樓於城
西僻地坐臥其中幅巾藜杖飄然若神仙一時名重海
內多願與納交所著有西樓樂府野菜譜等集 萬曆府志

康熙志云磐工題贈善諧謔與金陵陳大聲並為南
曲之冠嘉靖初李夢陽就醫京口元夕飲楊一清家
磐短衣下坐夢陽傲不為禮已分題咏詩磐得老人

燈遂口占云形骸憔悴不堪描尚使心頭火未消自
分不知年老大也隨兒女鬧元宵夢陽心知其嘲嘿
然而罷

黃諫字正卿高郵人博學工詩文尤善篆隸寓陝西蘭
縣進士及第歷任翰林院學士左遷廣州府通判卒歸
葬高郵諫著述頗富有書經集解大小篆隸書月令通
纂考古正文蘭坡集元倉子音釋等書行於世 高郵舊志

張縉字世文高郵人幼聰明能詩與兄經紘從弟繪有
張氏四龍之目正德癸酉領鄉薦久之不第謁選得武
昌通判專督郡賦歲終行縣令有繫民催逋者縉愀然

日公賦固急窮民凍餒囹圄亦可念也亟放歸期以春
和完辦民感之至期爭輸無後者擢守光州時歲凶民
饑請上官得穀數萬石賑之全活甚衆有忌之者摘其
耽吟罷歸隱於南湖自號南湖居士構草堂數楹貯書
數千卷晝夜誦讀目爲之昏猶令人誦而默聽之詩文
操筆立就雖率意口占皆合格調

高郵舊志

陸洙字滄浪興化人少負雋才與高郵王磐齊名以薦
授工部文思院副使吳文定寬賞其詩嘗於大廷中亟
稱之由是名愈著性豪宕好放言雖鉅公無所避當閹
瑾亂政嘗以一詩投李東陽云才名直與斗山齊伴食

中書日又西迴首湘江春草綠鷓鴣啼罷子規啼四方
傳之東陽由此避去晚節益恣獲罪戍邊死葬貴州康
熙間高郵沈氏寓貴竹見其遺碣猶在

興化舊志

張景字文昭儀真人由太學授鈞州同知爲政有聲與
守不協棄官而歸結詩社與黃頊殷和等爲雲林八友
唱和成帙自著有益齋集

儀徵舊志

張金字伯堅江都諸生博學能詩家貧有節操不俯仰
世態嘗謂門人曰貧也奈何門人曰聞之天道不絕善
人先生幸自寬金笑曰所恃者此後竟以貧終老

萬曆

江都志

李自奇字季常先世自陝西遷江都自奇八九歲能誦史記文選諸書父奇之命治舉子業自奇跪而請曰帖括役公車兒不願也遂肆力於古文詞尤工六朝小賦及樂府其書法諸體靡不工八分尤入妙

萬曆江都志

高懋功字世賞江都人少卿湧子嘉靖戊戌武進士授錦衣衛左所鎮撫罷還江都故業散盡無以為家工為詩陸弼稱其五七言近體駸駸錢劉佳境下亦不失為戴叔倫溫飛卿之流卒年九十

萬曆府志

朱永年字仲閑儀真人嘉靖間貢南雍從祭酒呂柟遊究心理學仕光山令以儒術潤吏治翕然有聲吏部李

時春謂之古循吏會方士陶仲文寵於上以宮保銜奉命之興都監司臺使皆先驅郊迎永年弗往既見又長揖不拜仲文大怒馳疏劾之免歸杜門著書益肆力於學所著三山遊詠朱仲子集行世

儀徵縣志

張槩字範中儀真人嘉靖甲午中鄉試公車不第隱居澄江園潛心經史購求遺文寒暑搜討不間黃司馬瓚架外祠也因即外家藏書流覽廣識盡以發之文章瓚嘗修邑志未竟槩索其稿增葺梓之義例該博巡鹽御史楊選慕其才檄轉運使修鹽法志以禮聘主筆削一時士大夫稱尊宿焉

儀徵縣志

周璠字子重江都人以郡諸生補太學刻意爲古文詞
嘉靖間授惠安縣主簿旋罷歸初璠與同里史起蟄李
應暘葛澗輩竝博學互相切劘璠旣歸諸人雨散獨璠
偃蹇故居翛然以著述自嬉書多散逸或爲人乞去惟
存邗城子二卷葛澗序之

萬曆江都志

黃一正字定父江都人博涉羣書爲文雄卓典麗屢試
不遇銳意詩古文詞遍游海內過名山川輒有記廷尉
陳玉叔好古多聞稱爲畏友司寇王世貞見之曰此君
吾日中僅見留弁山園讀書子明唱十歲侍父客分韻
賦金山詩有孤島擎飛鷺狂瀾壓伏牛之句長入太學

所著有五經埤傳事物紺珠諸書

康熙府志

陸弼字無從江都人自髫髻至老治博士家言日夜不
少廢又好博涉多所撰述廣陵南北孔道結納賢豪長
者其聲籍甚嘗爲詩曰匣有魚腸堪結客世無狗監莫
論才何元朗激賞之趙貞吉當國議修史請徵故知縣
王一鳴故同知魏學禮太學生王穉登生員陸弼入史
館與纂修未上而罷所著有正始堂集

列朝詩小傳
按弼嘗修萬曆

郡志江都縣志迄今一百三十
餘年證疑攻信尚賴弼書也

章光斗字月鹿泰州人攻古文詞以歲薦授定海丞著
定海三賦謝徵收常例却視艦餽金邑人稱之嘗分修

惟揚志有鏡古叢奇臆見心銘諸刻秦州志

白應虛字子直江都人由選貢歷知新樂正陽二縣所

在著善政解組還偃仰一室左圖右書尤工五言古詩

直窺韋柳藩籬萬曆江都志

李存文字應魁秦州人嘉靖乙丑進士改庶吉士館試

讀臣鑒詩詞林傳誦詩文并書法稱為三絕授吏科給

事中陞工科右都給事上講學勤政一疏識者避之外

補楚藩叅議未幾引疾歸人謂其謙光待士清白持身

流風餘韻猶堪砭俗云秦州志

顧大猷字所建江都人夏國公成之裔孫以勲衛帶刀

侍從旋謝病歸讀書修韋布之行折節置驛延請四方

賓客聲稱藉甚嘗游秦中賦詩吊古留連武功鄠杜間

用御史薦募兵江淮兵甫出被讒謫戍赦還母死身病

早夜呼憤邑邑不得志而卒大猷事母篤孝撰鎮遠先

獻記敘述先人勲績甚備搜採掌故條列時政著書數

千卷祕不以示人私謚孝譽先生列朝詩小傳

李長敷字維寧興化人少師春芳曾孫尚書思誠長子

少負才名八試始中天啓辛酉鄉試一上春官報罷卽

不復試工詩詞善行草書弟長祺工文早世遺孤清愛

如已子督之力學與同舉於鄉清卒成進士長敷性和

易而狷介不苟人有囑其關說公府者輒面發赤蓋恥言勢利如此

興化縣志

宗名世字良弼興化人住江都萬曆己丑進士任紹興教授行至夢筆橋夜泊夢江淹授以綵筆三曰俾爾三世享文名秩滿陞肥鄉令以簡靜鎮俗邑人德之陞工部主事以病乞歸卒所著有蒙史畧含香堂文集子萬化中己酉北直鄉試仕潮州同知灝癸未進士孫元豫

元鼎觀俱有文名

康熙府志

劉永沁字清之寶應人與兄永澄交東林諸正人嫉惡甚嚴時崔呈秀巡按淮揚貪殘甚永沁言於左都御史

高攀龍攀龍過寶邑入朝遂上疏劾呈秀引寶應士人言為據呈秀投魏忠賢為假子反噬攀龍永沁幾不免迨奄黨伏誅乃罷永沁以選貢入都侍郎劉宗周給事中徐燿各疏薦於朝不果用永沁歸田里多所著述皆宗周刪定手蹟藏於家

寶應舊志

陳以忠字恕先江都諸生性孝友析箸時盡以父產與弟曰吾有硯田可耕也精於易義常曰六爻之義統於大象更為六十四卦大象說黃汝亨見之曰今之虞翻也

江都縣志

蔣善字元長江都人崇徵丙子魁於鄉閉戶安貧研求

邵雍河洛數所著有史記彙十卷 康熙府志

劉有綸字耿邗先世河津人以鹽筴籍江都兄弟八人

登乙榜者三綸孝廉三十餘年安貧守道不入公府遠

近弟子負笈者甚衆嘗爲當事籌軍國邊儲悉得要領

所著有上葉相公言當世要務書及三忠詩文誠明緒

言鹽法條議子梁嵩另有傳 康熙府志

李站字允同儀真人早有文譽以明經授日照令時青

齊寇亂站嚴守禦民恃以無恐以老告歸邑令姜埰聘

修縣志稿成而妻去任未刊自隆慶迄明末七十餘年

事蹟實賴站以傳 儀徵縣志

李長科字小友興化人少師春芳曾孫博學綜今古兩

中副車以賢良方正薦授廣西懷集令多善政以外艱

歸所著詩文甚富行世者有金湯十二籌遺民廣錄及

廣仁品諸編 興化縣志

孫鼎字大宣江都人崇徵丁丑進士授大理評事典試

四川所拔皆名雋丁內艱歸不復仕閉門著述吟觴自

終子繼登繼邈皆有文名 江都縣志

葉崇本字元符高郵人兄弟四人皆博學崇本尤穎異

魏戶讀書博涉經史所著春秋合傳六卷問棘躓言四

卷易經講義三卷傳於世 高郵州志

徐石麟江都人閉戶著述有趨庭述訓枕函待問北醒
語天人升降圖說等書

康熙府志

江九臯字鶴誠其先歙人遷儀真博學善屬文爲太學生屢試不偶退而著書尤邃於經史後棄家遠遊莫知所之

儀徵縣志

王維寧字江門儀真人以詩賦著名尤工書法求者如市一筆不如古法卽毀之償以已紙後貧甚或謂曰此可得錢笑曰吾學書豈爲口腹計耶弟維亮亦精草書

時人呼爲二王

儀徵舊志

蘆光達字觀五江都諸生性至孝五歲失母哀毀如成

人鄰母憫其幼市羞脯啖之拒不食長嗜學家故貧從知交借書以讀冬無完衣環走一室跳踊以敵寒暑夜置足甕中披襟朗誦日出猶篝火熒熒爲文疏解至理多衛道之言年三十八以疾終著述甚富自經史諸子以及岐黃農圃之書悉手鈔錄易簣時尚手持一編云

江都縣志

王玉藻字質夫江都人銓部觀濤子也登崇徵癸未進士筮仕得浙江慈谿令未久歸里閉門謝客怡情詩酒自附東陵栗里之遺後作絕命詞飄然而逝子方岐博

學能文克紹家學云

康熙府志


國朝熊敏慧字穎生江都瓜洲人順治乙酉舉於鄉布袍
 蔬食潛心性命之學兼工古文詩歌旁及書畫晚歲居
 宜興張渚怡情山水以終所著有汲冷堂集子維熊字
 偉男歲貢生亦以文學知名好表揚節烈著有瓜渚貞
 烈志以傳殉節婦女又著閱史約書十五卷 江都縣志

李沛字平子興化人明少師春芳四世孫幼負才尚志
 以忠義自許久困諸生鬱鬱不得志遂棄舉子業專從
 事古文辭尤長於詩與從弟沂交相倡和日究論漢魏
 三唐之旨遂俱以詩名沛意氣高伉不詭隨流俗動與
 物忤盡以其不得於中者發之歌咏故嘻笑諧謔怨懟

憤憤無聊不平之氣具於詩見之以疾卒人甚惜之著

有平庵詩集 興化縣志

李澄號鏡月興化人移居高郵明少師春芳四世孫年
 十四補諸生經史百家之書無不淹貫順治乙酉舉於
 鄉嘗以父讐未報憤不欲生久之得巨憇斃之天下咸
 稱其孝後遂絕意仕進肆力詩古文辭遍遊名山大川
 足跡所至詩文盈篋晚尤粹於經學叅互考訂多所發
 明又博采古聖君賢臣懿士淑媛之事附以論斷用垂
 明鑑每歲饑出遊常載米豆百斛歸令諸子遍歷閭閻
 見饑寒者贈之又捐腴產為義田歲取所獲濟族之貧



者所著有敦好堂詩文集三十卷懿行編八卷經濟考八卷廬山志十五卷

高郵州志

張標字玉立江都瓜州人順治壬辰進士授工部主事

權南新龍江二關俱有廉能聲晉郎中歸標為文章根

柢六經鎔錘諸子論者謂壬辰榜中標與李來泰戚藩

唐德亮相伯仲云

江都縣志

李瀚字士翔興化人亦少師春芳四世孫弱冠補諸生

試輒冠其儔伍年三十充廷貢後棄舉子業杜門不出

喜讀書談名理於釋典道藏及陰陽醫卜家靡不該覽

與人論文藝壘壘不倦遇俗士則睥睨不屑意泊如也

著巖庵集子國宋別有傳

興化縣志

朱克生字秋厓寶應國學生攻舉子業承凌溪射陂家

學尤肆力於詩又從兄克簡之燕之閩歷名山川多交

文人學士嘗著武夷山賦工麗雅贍名聞一時新城王

士徵長洲汪琬皆愛重之與為倡和士徵贈詩云海內

風騷調未孤故人才筆妙珠湖可以知其概矣所著秋

厓集汪琬為之序

寶應縣志

宗觀字鶴問興化人居江都以江寧籍中壬午副榜司

鐸貴池遷常熟皆以訓士有方為四方稱道生平好古

勤學長於吟咏而襟懷曠朗不問家人生業其詩蕭疎

幽雋在王孟韋柳之間新城王士徵甚愛賞之從弟元鼎字定九亦以詩名

江都縣志

陸舜字元升泰州人康熙甲辰進士初任刑曹多所平反為兩大司寇倚重擢浙江督學風清弊絕矢拔孤寒每試士命題必自制一藝為諸生程式雖同場屬學分題以及經論無不徧作諸生瞻絳帳中搖筆如飛及讀其文皆精湛雅馴出入經史益相歎服競傳誦之以疾乞休居林下二十年詩文益富康熙戊午薦舉博學宏詞未赴所著有雙虹堂集行世

泰州志

桑豸字楚執江都人早歲能文兼工書畫篆籀既餼於

庠力學篤行鄉里欽服丙寅膺歲貢著有編年詩存四

十卷文集二十卷廣陵紀事四卷

江都縣志

吳蓮字余嘉江都人幼孤奉孀母苦志力學補諸生食餼以文章知名四方負笈從遊者甚眾垂老膺歲薦惟以著書教子孫為事有愛日堂文集玉井詩詞若干卷子高佐志祖俱歲貢生孫顓孫庚子舉於鄉

江都縣志

汪懋麟字季角江都人康熙丁未進士授中書舍人每入直必攜書卷竟夜展讀時有楚人朱二眉號神仙傾動公卿懋麟著辨道論力詆其妄值憂歸膺薦舉博學不赴服闋以主事銜入史館與修明史越三年補刑部

主事能辨疑獄尋罷歸杜門絕俗晝治經夜治史以鄭
 樵通志浩繁手為刪訂其為文法歐曾詩合唐宋為一
 家著有百尺梧桐閣集二十三卷兄耀麟字叔定初與
 懋麟齊名以諸生貢入成均兄弟相友愛墳篋倡和無
 間晨夕耀麟著有抱耒堂諸集二十六卷 江都縣志

高以位字素其江都人康熙庚戌進士授中書舍人著
 述甚富後學咸奉為架範家教尤嚴肅弟以佑字天申
 天性醇謹篤於孝友生平無疾言厲色佑子克暮康熙

丁卯舉人漢陽知府 江都縣志


厲士貞字烈士儀徵人祖舉父文華皆以篤行著士貞

自少力學貧無擔石儲妻史氏以絀績佐之順治乙酉
 舉於鄉九上公車至康熙庚戌始成進士所為文雄快
 靈敏能獨開生面至今士林傳誦之 儀徵縣志

吳綺字蘭次江都人五歲能詩長益淹貫尤工駢體順
 治九年拔貢生授中書舍人奉

詔譜

楊繼盛樂府遷兵部主事歷兵部郎中知湖州府濬碧
 浪湖構峴山諸亭以成名勝郡人凌義渠為明末忠臣
 棺未窆綺捐資卜地葬焉既罷歸貧無田宅購廢圃以
 居有求詩文者以花木為潤筆因名其圃曰種字林所
 著有林蕙堂集唐詩註記紅集宋金元詩永等書 江都



陳啓貞字右周儀徵人少穎異博洽經史文辭冲容登康熙丙辰進士爲人謙和謹厚鄉國推爲篤行長者未仕而卒子光表丙子舉人惟杜門著書以捐介自愛現年八十餘歲

儀徵縣志

程濬字浚遠本歙人居江都少工文章有名譽登康熙丙辰進士官禮部郎爲尚書所倚重出知大名府寬厚和平吏民安輯百姓建祠祀之

江都縣志

許承家字師六江都人承宣弟幼與兄刻苦力學同負盛名康熙乙丑成進士選庶吉士授編修掌院知其宿

學館中大著作多屬之辛未會試充同考官將循資遷坊局念兄方里居願請假相追隨及兄沒思念流涕不置尤篤於友誼周急賑乏凡喪葬婚姻必爲之所友朋賴之所著有獵微閣集

江都縣志

鄧漢儀字孝威泰州人淹洽通敏貫穿經史百家之籍尤工詩學爲騷雅領袖太倉吳偉業合肥龔鼎孳皆與爲倡和登壇執牛耳者數十年康熙己未舉博學宏詞科漢儀奉

名

赴京師試授中書舍人卽辭歸偃仰山林日以吟觴自適暇或扁舟至郡坐臥董子祠中執經問業者車馬塞

衢巷念詩學荒蕪乃品次近代名人之詩為詩觀凡四集別裁偽體力追雅音海內言詩之家咸宗焉

泰州志

朱璣字宮載江都諸生天性醇厚潛心理學著有太易捷解嶽起堂文集子浦康熙庚辰進士湖廣武昌道

江都縣志

程文正字笏山江都人少工詩古文辭善書法康熙辛未成進士筮仕工部都水司主事巡視街道恪勤供職不名一錢以疾歸鍵戶不與外事所著有水部遺詩一

卷子夢星壬辰進士官編修

江都縣志

吳世燾字幼日高郵人世燾弟康熙戊辰進士選庶吉

士授編修

御試乾清宮從幸瀛臺詩文皆稱

旨選直 內廷因親老請假歸家十二年終養丙戌入都奉

職辛卯歷遷左右中允尋以原官致仕歸值歲薦饑高

郵下河尤甚燾請於巡鹽御史李陳常發米三千石設

厰賑粥於東山之下全活饑民甚眾以疾卒於家

高郵

州志

史申義字蕉飲甘泉人康熙戊辰進士選庶吉士授編修歷禮科掌印給事中以疾告歸申義幼穎悟為諸生時文名噪遠近所著作宏深矯健不肯一字因人尤工

詩初做西崑既悔其少作歛才歸法風格益上

聖祖嘗遣中使至直廬問翰林中能詩者誰為最大學士陳

廷敬首以申義對其推重館閣如此 江都縣志

顧圖河字書宣江都大橋人父九錫有文名圖河淹洽經史工古文詞善書法康熙甲戌登一甲第二名時

聖祖覽對策至治河一條曰熟悉形勢必生長江淮留心時

務者自是深被知遇授編修充日講官直南書房與

修一統志諸書考核精詳稱鉅手出視湖廣學政抵任

三月卒於官所著有雄雉齋集 江都縣志

王式丹字方若寶應人凝鼎之子幼讀書穎悟過人以

名諸生選拔入成均凡所歷試文士林傳誦以為式康

熙癸未會試殿試皆第一授翰林院修撰奉

特命分修皇輿表甲申修佩文韻府開局 武英殿

命孫致彌為纂修官以式丹為之副又分修一統志凡大撰

作同館者悉讓式丹居官十年唯以吟誦自娛旅況蕭

然自守泊如也辛卯冬罷歸僑居郡城日與鄉士大夫

譚詩論文以為樂式丹早負盛名冠冕海內從不自表

暴喜獎誘後進聞人有一長則津津道之不容口士以

是多歸之所著有樓村詩集及文編行世子懋懋懋訥

皆舉人孫箴輿壬辰進士歸德知府 家傳

吳蔚起字豹文本歙人隨父遷江都早年好學屏跡郭外僧舍刻苦文藝康熙丙子舉於鄉上公車不第自悔曰吾學未充也聞宜興儲欣名負笈往從之三年業大進癸未成進士授戶部主事歷員外郎中皆以恪勤著名擢御史歷掌京畿道事以終養乞歸閉門却掃有造謁者咸辭不見子安國辛卯舉人

江都縣志

李國宋字大村興化人明少師春芳五世孫瀚之子也弱冠卽以詩文著名江淮間新城王士微爲郡司李號海內宗匠每舉詩文大會國宋輒居其冠王傾心推服賞譽不置口困諸生久至康熙甲子始舉於鄉其經書

制藝四方購誦學者奉爲指南所著螺隱居詩集識者

謂自宋陸務觀後詩之多而工者無踰於國宋云

興化

續志藁

陳厚耀字泗源泰州人康熙丙戌進士生平學問淹博爲諸生屢試輒冠其曹尤究心曆法算法研究數十年獨窺精奧及釋褐循例授蘇州教授奉

台

特授中書科中書開局監修算法晉翰林院編修屢擢

左春坊左諭德戊戌充會試同考官以老疾乞休卒於

家

泰州志

王仲儒字景州興化人幼時穎異工舉子業淹貫經史

揚州府志 卷之三十一
為諸生領袖中年絕意場屋專肆力於詩沉雄渾噩獨
步少陵不屑道輕靡脆弱一字弟熹儒字歙州以諸生
貢入成均亦擅詩文工書法與兄齊名著述之富亦相
埒海內知名士游轍所至靡不與之結契藝林中評品
風雅必屈指與化二王云 典化續志彙

楊潛字滙南江都人幼嗜學善詩古文備四體書法以
獻賦取入纂修館康熙辛卯舉順天鄉試壬辰

欽賜進士

改庶吉士授檢討潛博聞強記一寓目終身不忘

家貧母老每得俸先緘寄以養其母以疾卒於官 江都縣志

賈國維字子似高郵人早年擅文名中丙子順天舉人

聖祖南巡獻詩賦稱

旨取入內廷纂修丙戌試禮闈不遇

特旨與中試貢士一體 殿試登一甲第三人授編修一特

館閣著作多出其手乞休歸更留心淮揚水利探源竟

委纂輯成編皆有關民生休戚弟兆鳳已卯順天鄉試

第一與國維同榜進士官檢討

李必恒字北嶽高郵諸生積學能文章學使者歲科試

輒冠其儕棘闈屢躋益肆力於詩體源於漢魏瀝液於

韓杜汎濫於元白歐梅蘇陸諸家凡五七言近體皆

妙而於樂府古詩尤工著有三十六湖草堂詩集商
少保宋犖選刻江左十五子集中

高郵州志

郭嗣齡字引年甘泉人光子繼光兄天奎後奉母以孝
聞家貧授徒以修脯為其兄嫂營葬生平講程朱正學
所著神化性命通一無二論士林傳之康熙乙未成進

士改授松江府教授潔已課士為一時廣文之最雍正
癸卯浙江聘同考官以病歸卒於家

江都縣志

陳新楷字依宣江都人若年應試屢冠其軍試藝流傳
四方奉以為矩遊其門者半庠序生平孝友厚篤本於
天性年七十膺歲薦子夢文雍正癸卯舉人瀏陽知縣

江都縣志

蔣進字紉園高郵人幼涉經史工文章醇正典雅為藝
林傳誦執經問字之士屢滿戶外請業者畧經指授皆
成名進康熙乙酉丙戌聯捷成進士戊戌謁選授阜城
知縣以疾未赴任歸里長貧如故仍以授徒講學終其

身 高郵州志

魏嘉琬字篁中江都人儀徵籍都之子也攻制藝善抉
摘幽微宗伯許汝霖視學江南拔冠儀邑康熙丙子奉
於鄉宜與儲欣德州孫勳為序其文稿行世有咀蔗庵
詩八卷義門何焯比之李賀云

揚州府志

卷之三十一

人物文苑

三

杜光先字海樹泰州人性至孝髫年值母疾晝夜侍奉不少倦母歿臥父足畔三十年工文藝試必高等康熙庚辰成進士筮仕湯溪知縣清正愛民屢有嘉禾之瑞湯人建生祠祀之告歸後閉門著書益研究程朱之學將終語其子曰我此時自檢從無不可告人之事遂端

坐而逝

泰州志

郭元鈺字于宮江都人士璟子博學工詩文

聖祖

南巡元鈺以諸生兩次獻詩書蒙嘉獎取入纂修館

預修佩文韻府又奏請刻全金詩輯元好問中州集

上之授中書科中書舍人有鶴庵牛鳴雙村等集

揚州志

俞楷字陳方泰州人由諸生貢入太學工文章詩賦士

林咸重其名康熙乙酉供奉內廷進經學劄子分析

五經源流次第

嘉

納之既以纂修敘績授華亭教諭訓士有方所著三極

易知錄等書皆有功理學弟梅癸未進士官翰林院編

修

黃涓字伊人江都諸生幼工制義通諸經貫申史漢唐

宋八家之文學使者每試拔冠其庠更延致幕中叅校

文藝涓家貧歲得館穀供孀母甘旨更以資昆弟子姪

衣食之乏性喜闡揚幽潛凡里中忠臣孝子義夫節婦必訪其遺事撰傳贊以表暴之母亡以哀致疾數月而終士林惜之

武勲

宋陳憲廣陵人元嘉二十七年魏侵宋圍縣瓠憲以參軍行汝南郡事城中戰士不滿千人魏晝夜急攻作高樓臨城矢下如雨又施大鉤於衝車之端以牽樓堞壞其南城憲內設女牆外立木柵拒之魏人填塹登城憲督戰短兵相接氣愈奮魏人引兵還文帝以憲爲龍驤

將軍 宋書

南齊呂安國廣陵人泰始二年劉劭征殷琰於壽春安國以建威將軍爲勳軍副抄斷賊糧道燒其運車多所傷殺琰衆奔退安國追之至壽春琰閉門自守安國屯據城南功第一封鍾武縣男元徽三年出爲持節都督諸州軍事兗州刺史明年齊王以安國爲湘州刺史進號前將軍齊建元二年魏寇邊上遣安國出司州安集民戶永明二年徙都督南兗諸州軍事平北將軍南兗州刺史六年遷領軍將軍安國累將率在朝以宿舊見遇尋遷散騎常侍金紫光祿大夫卒諡肅侯 南齊書

梁呂僧珍字元瑜東平范人世居廣陵梁祖爲豫州刺

史以爲主簿妖賊唐瑀寇東陽梁祖東討使僧珍知行
軍衆局事僧珍受命當行不過私室魏大舉南侵長沙
王爲梁州刺史被圍連月梁祖援義陽間諜不通欲遣
使至襄陽求梁州問衆皆憚莫敢往僧珍請充使單舸
上道至襄陽督遣援軍且獲長沙王書而返梁祖甚嘉
之事寧補羽林監東昏卽位僧珍西歸梁祖以爲中兵
參軍委以心膂義兵起遷輔國將軍平郢州進爲前鋒
大將軍大軍次江寧僧珍與王茂率精兵先登東昏將
李居士與衆來戰要擊大破之乃進軍白板橋築壘李
居士覘知衆少率銳卒萬人薄城僧珍謂將士曰今力
不敵不可與戰須至塹裏當并力破之俄而皆越塹拔
柵僧珍分人上城矢石俱發自率馬步三百人出其後
守陴者復踰城而下內外齊擊居士應時奔散獲其器
甲不可勝計東昏大將王珍國列車爲營背淮而陣王
茂等衆軍擊之僧珍縱火車焚其營卽日瓦解建康城
平僧珍率所領先入清宮封檢府庫梁祖受禪以爲冠
軍將軍封平固縣侯天監五年僧珍以去家久表求拜
墓梁祖欲榮之授本州刺史僧珍平心率下兒子宏以
販葱爲業僧珍至棄業欲求州官僧珍曰汝等自有常
分豈可妄求叨越但當速返葱肆耳僧珍舊宅前有督

揚州府志 卷之三十一
郵解鄉人勸徙解益其宅僧珍怒曰督郵官解也豈可
徙之姊適于氏在市西小屋與列肆雜處僧珍常導從
鹵簿到其宅不以爲恥在州百日徵爲領軍將軍僧珍
有大勲恩遇隆密性恭慎當直禁中盛暑不敢解衣侍
御座屏氣鞠躬果食未嘗舉箸嘗因醉後取一柑食之
梁祖笑謂曰便是大有所進祿俸外月給錢十萬賜資
不絕卒諡曰忠敬侯 梁書

陳杜僧明字弘照廣陵臨澤人形貌眇少有勇力善騎
射梁時從盧安興後從陳祖爲主帥征交阯討元景仲
並有功侯景之亂隨陳祖入援京師破蘭裕爲前鋒擒

裕斬之又與蔡路養戰於南野馬被傷陳祖馳往救之
以所乘馬授僧明復進因大敗路養高州刺史李遷仕
將襲南康陳祖令僧明等拒之連戰百餘日擒遷仕侯
景遣于慶等寇江南陳祖頓豫章令僧明爲前鋒所向
克捷仍隨東討軍至秦州僧明率麾下燒賊水門大艦
及景平以功除明威將軍南兗州刺史進爵爲侯荊州
陷陳祖使僧明率吳明徹等隨侯瑱西援於江州病卒
諡曰威天嘉二年配享高祖廟 陳書

唐辛讜太原尹雲京孫居廣陵性慷慨重然諾專務賑
人之急咸通十年龐勛亂徐泗時杜悛守泗州賊極力

揚州府志 卷之三十一
攻城讜聞往勸悞避去悞不肯讜義之夜以小舟穿賊壘至洪源驛請監軍郭厚本救泗厚本已諾淮南都將王公弁沮之讜拔劍瞋目呼曰泗州陷在旦夕公等奉詔赴援逗遛不進欲何爲卽欲揮刃向公弁厚本持之讜望泗州大哭帳下皆流涕厚本義其心選士卒隨讜入泗夜半斬賊柵大呼由水門入賊軍駭退人心遂固旣而賊益兵攻城以鐵鑕斷淮流梯衝雲合凡周七月晝夜不息賴讜犯難仗義求救淮北諸軍會馬舉以大軍至賊解圍去卒全一州皆讜力也讜無子猶子山僧元老等在廣陵每出則書一姓名謂悞曰志之得嗣爲

辛悞益感之賊平授泗州團練判官侍御史歷嶺南西道節度使

舊唐書

五代呂師造揚州人爲淮南都將天復元年李神福攻杭州浙將顧全武列八寨以待之神福使師造伏兵青山下陽退兵以誘全武伏發全武被執天祐初復從周本援衢州謂本曰敵去我咫尺而陣不動是輕我也必擊之是日中道破浙軍師造實與有力焉已又從周本南伐敗苑玫於上高遷池州團練使師造歷仕吳主南平征伐多在行間所嚮輒摧鋒排陣累官光祿大卿檢校太保兼御史大卿

十國春秋

張訓廣陵人勇悍多膽畧時人謂之大口張吳王行密據合肥訓往見甚歡授親兵擊舒州盜吳迥等揚州之役訓潛入城滅餘火得穀數十萬斛以賑饑民明年取常州復屯安吉斷孫儒糧道有功授常州刺史遷淮海都遊奕使轉尚書左僕射未幾王茂章破密州以訓爲密州刺史茂章爲汴兵所追解兵去諸將請焚城大掠而歸訓不可乃封府庫植旌旗於城上自以精兵殿後頃之汴將王檀來攻望見旗幟不敢逼訓竟全軍還卒

贈太傅清河郡公

十國春秋

明潘原明泰州人與張士誠同起鹽徒士誠以爲浙

行省平章守杭州明李文忠師至原明詣軍門納款太祖以原明全城歸附嘉之仍授行省平章世襲指揮同知洪武十四年雲南新定以原明爲布政使民皆安之

十五年卒賜葬鍾山之陰

泰州舊志

李伯昇泰州人初與張士誠同起士誠據姑蘇以伯昇爲浙江行省平章守湖州徐達攻湖州伯昇固守達以降將呂珍徇城下乃出降太祖仍其官洪武元年進中書平章同知詹事院事征陝西二年大行封賞世襲指揮僉事五年命爲征南右副將軍討靖州蠻十三年命守漳州未幾召還卒

泰州舊志

徐司馬字從政揚州人元末兵亂年甫九歲棄道傍太祖得之養爲子冒國姓屢立戰功進都指揮使復徐姓遷鎮河南勅書官而不名再擢中軍都督府僉事卒司馬故好文學遇人無貴賤率煦煦謙厚所至撫循士卒甚得衆心其在浙東河南尤有惠政公暇退居一室蕭然如寒素世稱賢將

本傳

顧成字景韶江都人少魁岸膂力絕人明祖渡江成來歸嘗從上出舟膠於沙負舟而行從攻鎮江與勇士十人轉鬪入城被執十人皆死成躍赴斷縛仆持刀者脫歸導衆攻城克之授百戶大小數十戰皆有功進指揮

僉事洪武四年從臨江侯入蜀蜀平改成都後衛八年調守貴州討羣蠻平之十四年從潁川侯征雲南爲先鋒首克普定守之進指揮使諸蠻隸普定者悉平十七年平阿黑螺螄等十餘寨降尾灑蠻酋二十一年討乖西諸蠻擒關索嶺賊渠斬土官阿宗大布恩信諸蠻帖服進都指揮同知平康佐都勻諸蠻二十九年遷右軍都督僉事佩征南將軍印征水西誅其酋明年討五開蠻九所破六洞一百三十七寨貴州平建文元年爲右都督從耿炳文禦燕師戰真定被執燕王解其縛送北平輔世子居守燕王卽位封鎮遠侯子世券仍鎮貴州

更置州縣威震百蠻為立生祠成忠謹涉書史卒年八十有五贈夏國公諡武毅 本傳

陳珪泰州人洪武初以功授百戶改燕山護衛從燕王出塞為前鋒進副千戶已從起兵積功至指揮同知佐世子居守累遷都督僉事封泰寧侯永樂初董營北京宮殿八年帝北征輔趙王留守北京兼掌行在後府經畫有條理甚見獎重年八十五卒贈靖國公諡忠襄 本傳

曹義字敬方儀真人襲職為燕山左衛指揮僉事累功至都督僉事充遼東副總兵代巫凱為總兵官數與兀良哈戰正統九年春會朱勇軍夾擊斬獲甚多進都督

同知十二年春出廣寧塞斬兀良哈百餘人進右都督十四年追寇開原塞外既又出廣寧禽寇百餘人進左都督景泰初脫脫不花以三萬騎深入毀屯堡大掠義奪半歲俸已寇復入掠義敗之連洲稍還所掠人口英宗復辟召還推恩特封豐潤伯卒贈侯諡莊武 本傳

蔣貴字大富江都人從燕王起兵積功至衛指揮同知從大軍征交阯及沙漠遷都指揮僉事掌彭城衛事宜德二年從總兵陳懷討松潘諸番大破之進都指揮同知鎮守密雲七年復命為叅將佐懷鎮松潘九年諸番復叛與總兵方政分道進討攻破任昌大寨以次討平

龍溪等三十七寨進都督同知充總兵官佩平蠻將軍
印代政鎮守其地正統初召還爲右都督會阿台寇甘
涼命貴移師討之明年春寇駐賀蘭山後貴破之狼山
窮追抵石城泉阿台驚遁已而諜知敵巢將精騎二千
五百人爲前鋒出關疾馳三日夜至兀魯乃阿台方牧
馬貴猝入馬羣令諸軍以鞭擊弓韉驚馬馬盡佚敵既
失馬乃挽弓步鬪貴縱騎蹂擊大敗之復分軍爲兩翼
轉戰百餘里朵兒只伯以數騎遁走西邊悉平封定西
伯給世券四年鎮甘肅六年命佩平蠻將軍印征麓川
蠻思任發與王驥帥師分三路進破木籠山七寨及馬

鞍山象陣功皆第一還帝親慰勞進封定西侯八年復
與驥討思機發緬人聲音送賊貴密焚其舟大戰一晝
夜盡俘其妻孥象馬破壘二百焚寇遂平師還賞賚甚
渥十四年卒贈涇國公諡武勇貴起卒伍不識字天性
樸實忘己下人能與士卒同甘苦出境討賊衣糧器械
常身自囊負不役一人臨陣輒身先之以故所向有功
本傳

蔣琬江都人定西侯貴孫也嗣侯天順末佩平羌將軍
印總兵甘肅築甘州沙河諸屯堡成化八年召還協守
南京兼督操江十二年入總神機營兵上言北京宜於

揚州府志 卷之三十一
西北隅故址增築土城又言大同宣府諸塞下腴田無慮數十萬悉爲豪右所占畿內八府良田半屬勢家請按覈定其科額戢豪右毋得侵奪雖不盡行時論韙之十三年帥京軍防秋大同宣府陳機宜十餘事皆報可二十年出禦邊寇累加至太保兼太子太傅卒贈涼國公諡敏毅子驥嗣弘治中充總兵歷鎮薊北遼東湖廣官中外二十年家無餘貲

本傳

許貴字用和江都人永新伯成子也襲職爲羽林衛指揮使擢山西行都司督操大同諸衛士馬久之守備大同西路英宗北狩邊城悉殘貴激戰士以忠義敵來輒

敗之進都指揮使景泰元年春充右叅將敗寇於威遠奪還所掠人畜再遷都督同知大同乏馬命求民間得八百餘匹所司不給直貴爲請乃予之嘗募死士入賊壘劫馬百餘悉畀戰士士皆樂爲用後以疾還京英宗復辟命理左府事尋以副總兵鎮守松潘未抵鎮而山都掌蠻叛詔便道先剪之貴直抵其巢連破四十餘砦賊遠遁貴亦感嵐氣未至松潘卒帝爲輟朝一日賜賻及祭葬如制

本傳

許寧字宗道貴子也正統末以軍功爲錦衣千戶父歿嗣指揮使成化初充大同遊擊將軍禦寇擒其右丞把

禿等十一人改督延綏地通河套寇數入掠孤山堡寧
提孤軍奮擊三戰皆捷寇渡河走明年復掠康家岔寧
出塞追戰又出西路破敵黎家澗進都指揮同知朝廷
以阿羅出復入河套命王越朱永禦之而以寧充總兵
官冬賊入安邊寧追擊有功七年又敗寇於滉忽都河
壘書褒獎滿都魯等屢犯延綏寧率鎮兵力戰寇不得
志乃出西路直犯環慶固原寧率輕騎夜襲之鴨子湖
殺傷甚衆奪畜馬而還又明年滿都魯等大入西路寧
及宣府將襲破其巢進署都督同知築邊牆增營堡寇
患衰息弘治初用薦署都指揮使踰年卒贈都督僉事

寧束髮從軍大小百十餘戰身被二十七創威名聞異

域性沈毅守官廉待士有恩不屑干進人以爲難

本傳

顧溥江都人鎮遠侯成元孫也年十三嗣侯與諸小侯
入國學用薦掌五軍右掖弘治二年拜平蠻將軍鎮湖
廣桑植安撫司上官殘虐溥捕首惡斬之五年冬貴州
都勻蠻乜富架作亂梗滇蜀道詔溥充行軍總兵官率
兵八萬討之分五路刻期並進誘誅富架父子斬首萬
計加太子太保增祿二百石入提督團營兼三千營掌
前軍都督府事十八年卒謚襄恪溥清慎守法卒之日

囊無餘貲英國公張懋出布帛以殮

本傳

顧仕隆溥子也嗣侯管神機營左哨得士心正德初出
為漕運總兵淮安十餘年以清白聞數請恤軍卒又請
開通惠河時不能用及後開之人果稱便武宗南巡江
彬橫甚折辱諸大吏惟仕隆不為屈嘉靖初移鎮湖廣
尋召提督三千營加太子太傅掌中軍都督府事論奉
迎防守功也錦衣千戶王邦奇怨大學士楊廷和兵部
尚書彭澤上疏言哈密失策事由兩人帝怒逮繫廷和
諸子壻給事中楊言疏救忤旨事下五府九卿科道議
仕隆言廷和功在社稷邦奇小人假邊事惑聖聽傷國
體有召切責移病解營務卒贈太傅諡榮靖 本傳

仇鉞字廷威江都人世襲衛指揮同知以破賊功進都
指揮僉事充寧夏遊擊將軍正德五年安化王寘鐫與
指揮何錦周昂等反鉞陷賊中京師訛言鉞亦從賊閣
學士李東陽獨明其不然鉞入城散其眾稱疾不出陰
約侯保勛楊英諸兵至河上從中發為內應又令人私
謂何錦宜急出守渡口防決河過東岸兵錦果出兵留
昂守城鉞稱病亟昂來問疾鉞堅臥呻吟言旦夕且死
蒼頭猝起揮殺昂鉞卽披甲跨馬出門一呼諸遊兵壯
士皆至遂擒寘鐫追獲錦並械送京師伏誅論功封咸
寧伯充寧夏總兵流賊劉六等寇亂畿輔山東河南諸

路皆為殘破鉞督兵屢敗之後追於狼山海上盡殲其
衆進爵為侯與世券卒諡武襄

萬曆府志

顧寰江都人仕隆子也嗣侯歷僉中左二府事守備南
京奉讞獄多所平反嘉靖十七年為漕運總兵官江南
北多災傷寰請被災地停漕運一年令改折色軍民交
便又條上漕政七事並施行諸為漕蠹者病之遂中蜚
語為給事中王文所劾已按驗不實復僉右府再出鎮
淮安會安南莫宏瀛當襲父都統使為族人莫中正所
逐遂有議乘釁取安南者乃移寰鎮兩廣寰與提督侍
郎周延決策送宏瀛還國安置中正與邊安南遂定桂

林平樂徭反殺縣令寰討平之復鎮淮有禦倭功
京營督軍助大工作加太子太保隆慶五年授京營總
督神宗嗣位加少保致仕萬曆十年卒贈太傅諡榮僖
自溥至寰三世皆寬和廉靖內行謹飭曉文藝通賓客
世為督漕善於其職

本傳

喬基江都人世襲揚州衛指揮僉事中武科性孝友父
嗜鱔魚及歿終身不忍舉箸精騎射累官京營叅將以
病歸嘉靖間倭寇通州當道就家起之屢著戰功復授
蘇松叅將時倭再寇通州又大敗之於狼山下未幾病
卒橐裝如洗子孫寄棲官廨焉

康熙府志

揚州府志 卷之三十一
王繩堯字又元江都人父祖及堯俱以武科舉鄉榜第一
一天啓壬戌成進士累官四川南路總兵松潘威茂間
大著威望土司奢酋犯順繩堯計殄之銷鋒鏑爲錢鏹
洞獠咸感其德繩堯少事文墨有儒將風告歸年八十
六卒蜀人立祠祀之

江都縣志

張宿字垣樞高郵人崇徵丁丑武進士沉勇有智畧任
六合縣守備時流寇四起天下騷然宿選壯士爲親軍
練卒伍修城池賊不敢犯調守柘林宿度賊必乘已去
復來潛伏烽火幸輕騎陽往柘林明日賊果至烽舉回
軍勦殺殆盡遷南京遊擊與流賊顧三等相持歲用

少擊衆屢挫其鋒陞蘇江叅將尋陞江陰副總兵值賊
勢猖獗水軍失利宿領精兵出戰取薪圍宅命妻子曰
吾往恐不返家人不可受辱也脫有變卽自焚分兵張
左右翼待之賊前鋒突進宿奮力死戰親軍橫貫陣中
已出復入者再賊退走宿乃晝夜操練以已意教演水
兵不拘成法賊復至大破之斬其僞王蔡某捷聞拜本
鎮總兵賊又推蔡弟爲主往來紛擾數月間四十餘戰
皆捷江陰獲全旣而

王師南下宿變姓名潛歸越六年終於家

高郵州志

國朝楊捷字元凱其先寶應人以世襲指揮家遼左順治

揚州府志 卷之三十一 五
初授山西遊擊破太行賊有功陞副將討江西叛將金聲桓恢復九江南康諸郡陞總兵官鎮九江尋討賊粵東克潮州累加左都督太子少保移鎮揚州改山東提督平東萊之亂福建海氛未靖再晉少保兼太子太保提督福建水陸軍務至則先攻定海以分賊勢隨合師從惠安搗賊老營克之先是泉州陷於賊既克制府欲屠之捷力阻得免以功加昭武將軍時賊尚屯漸山等處分十九寨捷先取諸島嶼連建七營調集八槳各船示以欲渡賊受制不能分應遂破十九寨隨咨督撫訂期三路進攻積寇平以原銜管江南提督事給世襲二等阿達哈哈番

賜籍江都

聖祖南巡捷迎謁道左

御書丹誠二字額旌之卒贈少傅諡敏壯

江都縣志

董大用字仰山遼東籍泰州人順治初任贛州鎮中軍官金聲桓叛圍城數月石米五十金大用預儲米數千貯倉盡餉卒賑民時乘間出兵奮擊圍解以功陞廣東總兵子世職轉福建左路調守海澄宣布威德海上歸附者甚衆康熙三年告老

賜籍泰州屢歲水滂大用捐銀米以賑活饑民百餘萬口又

揚州府志 卷之三十一
修建學宮葺復海陽樓州人德之

泰州志

戚畹

南齊劉壽之廣陵人高昭皇后諱智容之父也仕宋爲員外郎后母桓氏夢吞玉勝生后時有紫光滿室以告壽之壽之曰恨非是男桓笑曰雖女亦足興家矣建元元年尊謚昭皇后贈壽之金紫光祿大夫桓氏上虞都

鄉君

南史

明陳公逸其名揚州人淳皇后父也宋末從張世傑軍厓山世傑死陳公舟亦敗得脫棲海島糧絕同棲者將往觸髅山食死馬陳公夢白衣人戒曰勿往食夜有舟

至可共載也寤而如戒是夕又夢紫衣人杖叩之曰起起舟至矣陳公驚起則已在元帥某舟中蓋公舊所事統領官降於元將憐而載之也時有令毋留附舟人統領官匿之皇板下飲食從板隙投之事將洩忽颶風大發將懼甚統領官白公有巫術令出而詛之風果止遂予公飲食送歸揚州由是棄軍籍避地盱眙以巫術行久之生二女其季卽淳皇后也公無子年九十九始卒洪武二年追封揚王媪爲王夫人立祠太廟東明年有言王墓在盱眙者中都守臣按之信帝乃命中書省卽墓次立廟設祠祭署奉祀一人守墓戶三百一十家世

世復而諭翰林學士宋濂文其碑撤太廟東祠本傳

邵仁興化人壽安皇太后之父也以國戚任杭州衛指揮

揮邵蕙晉昌化伯又有傳氏名政者樂陵王妃之父也

授兗府護衛經歷興化縣志

尹清其先華陰人襲官揚州衛洪武二十七年清授徒

京師選尚舍山長公主高皇帝妃高麗韓氏所生以早

失母最為高廟所愛賜予特盛清授駙馬都尉卒贈光

祿大夫嘉靖惟揚志

趙輝字孟暘其先宋宗室扈從南渡遂家江都父和某

府軍後衛千戶征交趾沒輝方七歲長以廕官補宿衛

太宗命尚太祖寶慶長公主拜駙馬都尉英廟北狩輝

留守京城辛年八十一嘉靖惟揚志

留中京地辛辛八十二
太宗命尚太師寶璽尋公生特柳淵勝標英國北孫聯

揚州府志卷之三十二

人物五

篤行

梁吳元嗣江都白沙村人子孫多壽百歲上下累業同居不分至吳琬惇義尤篤廣陵太守陳正平以事聞賜號義門置義順二臺以旌之

明南畿志

唐陳融廣陵棠邑鄉人有隱德不出鄉而里閭化之年七十二卒貞元初呂溫寓居是邑見鄉之人父子長幼各有倫序嘆曰芳蘭所生其草皆香美玉所集其山有光殆有賢者生於是乎遂停車累日周訪故老皆曰嘗

有陳融孝慈仁信不學不仕今也則亡清風猶在溫慨然曰先生以純德至行沉輝含耀可無以表彰之哉乃拔典校德私諡曰貞晦先生

萬曆府志

宋吳志興楊子縣塘下里人世篤孝義七世同居三百年室無私財積而能散惠及鄉人真揚間咸稱善士年九十三以高宗慶壽恩封迪功郎子汝明以孝著靈芝生於堂側異木連理開禧間敵騎入境民結焚蕩其廬獨完兵後大疫其家四十口皆無恙人以爲孝義之報

嘉定間詔旌其門

儀徵舊志

陳護字元法泰州人六世同居百口無間政和七年詔

旌其門建炎中兵燹不存節婦向氏於紹興九年貸金

贖產陳有司丐修遺趾州郡賞其義復榜建門閭

參嘉

靖惟揚志泰州志

茅信卿泰州人四世同居每旦家長坐堂上卑幼各以

序立拱手聽命分任以事畢則復命其有怠惰者輒鞭

辱之卒無怨言州守上其事表曰四世孝義之門

嘉靖

惟揚志

元秦昭廣陵人少遊京師其友鄧某載酒祖餞既而出

一殊色小鬟令拜昭曰此吾爲部主事某所買妾也幸

君便航可以附達昭弗敢諾鄧作色曰縱君自得之不

過二千五百緡耳何峻辭乃爾昭強從之至臨清天漸
曉夜多蚊內之帳中抵都持書往見主事主事問曰足
下與家眷來耶曰無有主事意不悅隨以小車取歸踰
三宿謁昭謝曰足下長者也已作簡報鄧公使知足下
能不孤所託遂相與痛飲盡歡而罷 陶宗儀輟耕錄

劉信甫揚州人鄰富商曹氏奴曹瀕死以孤托之孤漸
長叔利其財妄訴於府曰某貲產未析盡為姪據郡守
劉察其詐直之叔之子以父訟不勝慚憤毒父死而復
訴於府曰弟挾怨殺吾父適達魯花赤馬馬火者受署
之初與守不相能竟欲置孤法并以中守引致百餘人

抑使誣執孤殺叔守受賄之辭鞠信甫信甫曰殺入孤
實不知守無受賄被榜無完膚終無兩辭初信甫先遣
人密送孤至京師匿一貴人家至是厚以金帛賂達魯
花赤孤得免信甫減死既而叩蹕稱冤達魯花赤以罪
去守復官是訟費巨萬計孤欲算償信甫曰奴之富主
翁蔭也主有難奴幸脫之職耳力辭不受 輟耕錄

陳起字起宗真州人為掌刑獄吏夏用多疫旦暮勞問
給醫藥召獄卒諭善視囚出私財日具湯餌粥食給諸
囚無德色後起子孫累世貴顯 儀徵舊志

顧仲庸泰州人倜儻好義與保定張文友交契張為嶮

縣尹秩滿僑居江陰一日暴卒仲庸在京聞之卽走告當路者曰張文友未病願致仕因代入狀中書遂獲以嘉定知州致仕既領宣命又代文友之子告廕乃得注晉陵尉其家實不知也仲庸南歸致奠賻奉宣勅授其子人始驚嘆

嘉靖惟揚志

明顧師魯字惟學興化人少嗜書有文武才明初左相國徐達取興化師魯率父老迎謁達一見大奇之命指示前鋒旬日破吳十元帥遂取鹽城克寶應復興化平高郵下淮安摧鋒制敵所向皆有功師魯舅氏王信父子據沂州達表師魯持太祖手書往諭之信父瑄不從

拘師魯於別室欲殺之師魯得聞亡歸達方定江南欲敵以行師魯固辭乞終祖母養達爲請於朝賜羹湯三十六戶以榮養終身是絕意進取日居田里以琴書詩酒自娛師魯勇於義不求人知郵宗黨賑孤寒同里二百餘家待以禮者皆在軍見同鄉被掠者百人盡以財帛贖還國書後丁開鎮江陶莊及浚瓜洲諸壩師魯以粟千石賑白金數十觔罄家帑以給其貧餒者其好施利物類如此

參錢溥誌銘興化志

柏叢桂寶應人武時建言請築塘峴起槐樓達界首四十里以備水旱有司寢不行叢桂更相度地形畫圖

上道陳利害甚悉詔發惟揚丁夫五萬六千俾叢桂董
其役期月工成鄉人呼為栢家堰 寶應舊志

顧黑子揚州人與其主顧圭以戎籍隸泉州洪武初圭
坐事繫獄黑子操薪給圭圭釋歸復以甘脆為圭
養圭死其子賣黑子仍為酒家傭給贍其衣食為娶
妻人嘆黑子微賤而有士君子之行 名山藏

儲仲文泰州人惇行孝弟嘗通大義嘗市鹽遼陽載
布數車值寇騎圍城雨雪浹旬餓凍相屬仲文日坐逆
旅戶外探布散之不問誰其家而後以米求利若
之何并其本棄之仲文曰此何待也

潘開曝於門拾遺金十數兩默置厠舍簷間及晡有一
男子攜婦頓哭來仲文問之曰某夫婦解戍某地費不
給祇一子賣而得金今晨過此遽失去將死道路矣仲
文詢其封識并金幾何語悉合出歸之其人感泣取塊
金為謝仲文笑曰吾顧不能取之而需謝乎且察其有
饑色予之粥遣之其人曰吾無以報德逢人語君使君
聞於人人而已後仲文以壽終曾孫權官至吏部侍郎

諡文懿

名山藏 按泰州舊志仲文名宏字仲文

馬士權泰州人讀書重氣節寓京師與徐有貞善石亨
忌有貞欲殺之既降廣東叅政乃令人偽作疏毀謗朝

揚州府志 卷之三十一
三
廷假養病給事中李秉彝名上之逮秉彝訊不承亨等
因譖有貞怨望使所親馬士權爲此遣官校捕有貞收
士權下錦衣獄都指揮門達用諸惡刑拷掠瀕死士權
終無所言乃摘武功伯誥券纘禹神功語出有貞自撰
士權大呼曰有貞忠臣豈有自撰誥券露其逆謀之理
門達不能折會雷震承天門上恐赦赦之編金齒爲民
有貞出獄感士權義以女許婚其子及亨敗有貞赦歸
遂悔其婚士權亦絕口不言人益重之 康熙府志

陳東山字魯望江都人慷慨尚氣節嘗有寄千金者歿
已十載覓其子還之封識如故又挾重貲買穎上僕獲

黨盜之事覺株連者衆東山白官罪止其僕衆悉免累

穎人德之 萬曆府志

柳佳字世可真州人少爲諸生夜宿田舍有僕夫荷籠
投佳詰得其狀乃竊其主福建千戶王陞解京公帑也
欲以分佳佳責以大義竟訪陞還之陞感以金謝堅却
不受縣上其事爲表門焉 儀徵舊志

郝理北京衛籍十齡而孤家故貧有從父梁賈揚州富
巨萬往依之正德末中貴擅權諸大賈逮詔獄梁在逮
中諸大賈駭愕謂往必死理挺然請代梁往旣對簿申
寃狀反覆數千言不少絀刑曹白其事竟並諸大賈赦

之賈因梁奉金願交驩理却之再進再却初理歸梁
梁以凡兒畜之至是始重理理遂移家於揚梁歿理嗣
其業十年富十倍性好結納饋遺諸父執歲時不虛遇
貧乏士尤時時周贍之子莘登嘉靖丁未進士仕至湖
廣叅議封理奉直大夫

萬曆府志

陳鳶字理卿泰州人以恩例授本所副千戶少年以質
易起家值荒歲以米粥賑饑民死者給棺瘞之有鄉人
沈里袖金一袋來私屬曰余生平辛苦儲有二百金今
老矣子且幼熟思非公無可托者其爲我寄之無令人
知也因受而藏諸箝越數年沈歿鳶往弔既攜金以還

家計蕭然其子泣而拜曰微公長者吾不知死所矣太

史瞿景淳爲之記

泰州舊志

陸應期字國賢其先儀真人永樂間戍大同至應期賈
於兩淮復占江都籍嘗行齊魯間同舟者三四輩皆巨
盜數嫚罵之應期性仁厚時時推飲食相勞苦頃之盜
發擁應期坐樹下曰公長者不敢犯執同舟者榜撻甚
楚盡劫其貨而去應期好振貸人負之輒自燔其券生
平不善治生以是終窶子彌爲揚名人

萬曆府志

卞瑛字汝用江都人世務農治家有法五世同居士民
推舉嘉靖十三年有司覈實上之詔旌其門

嘉靖惟揚志

揚州府志 卷之三十一
李鏗字永懷興化人以子春芳貴封少師鏗五歲失父
事繼母能得其歡心性淳質謙謹不以子貴驕人間卑
有困苦者輒徬徨終夜不能寐必拯之乃已他邑民或
以冤繫鏗言於令得釋其人來謝則已忘之矣著孝友
勤儉四訓以示子孫令世守之當春芳以首輔致政歸
父母猶具慶奉養膝下近十載人以爲數百年罕見云
興化舊志

樊誠號思齋儀真人爲楚府典膳幼孤有意氣嘗遇故
人子鬻客爲奴卽捐金贖之歸宗遊豫章見一不遇士
欲自廢慨然贈百金慰使卒業後成進士報之不受

友假其名稱貸者以久負致訟輒棄千金產代償終不

自明時稱其厚 儀徵舊志

賈

一作栗

寬字朝用揚州衛人嘗暮歸道拾遺金守其人

至還之遺金者分半貽寬弗受餉以雞黍亦郤之里有
死不能棺者輒傾橐以助不給則質貸益之未嘗望報
焉 萬曆府志

閻金字體礪其先陝西人父琮爲合肥簿貧不能歸遂
家江都金任俠好義嘉靖戊午倭躡揚州知府石茂華
發民守城民望倭薄城率股粟時西北賈客在揚者數
百人金召其豪共登陴射殪其渠魁且聞陴間多塞上

人語疑其矢非邊外勁弓不能發遂宵遁境保無虞金
由是名聞江淮孫士選士聰曾孫汝梅皆相繼登科第
萬曆府志

丁効恭實應人膂力過人嘉靖時倭寇侵犯縣無城人
民逃匿村落効恭憤曰縣無一男兒耶結少年數十人
持長戟利刃迎擊南郭外手刃數人倭增兵來戰遂爲
所害兄効寬邑諸生也哭弟甚哀悒鬱以卒

實應舊志

陸鳳紀字怡吾興化人性孝友同父異母弟共五人白
首無間子姪不能娶者予之貲且置義田以贍焉雖起
家貿易性嗜翰墨先世遺蹟或放失不惜兼金購之什

襲以遺子孫雖坐肆中紫陽綱口不去手有儒者風舉

鄉賓八十二歲卒

興化舊志

許道字性之興化人沉思篤學通五經善詩賦由歲貢
爲餘姚訓導德性安詳私居無惰容無疾言厲色嘗就
浴人欲以卒然試之移其衣置遠榻道起就取衣從容
矩步雖裸程未改也

興化縣志

李鶴字騫伯儀真人博學洽聞試諸生輒高等居喪廬
墓旁朝夕上食如生時有白鶴朱蛸之瑞兄負賈人錢
千緡鶴鬻產代償收責於昭陽里中逋者以歲潦請寬
期盡焚券而返年八十八卒

萬曆府志

袁株字子立興化人嘉靖戊子舉人少受易於陸期范期范歿株爲經理其家拜其妻堂上擇其子孫之才者教之學成乃已及人仕數分俸金周之兩宦撫吉平巨寇不以師徒率生擒之終吉安知府祀名宦

興化舊志

鄭之彥字東里本歙人居江都爲郡諸生五世同居稱義門宗伯姜逢元謂其生平然諾無二言閨幃無二色其後子孫相繼成進士人謂積德所致

康熙府志

陳淮字思遠儀真人父璉知章邱縣淮隨任父致仕歸兩叔欲析產淮請以祖業讓兩叔自置一宅環堵蕭然揚曰澹軒雖異居而親睦不渝時人難之

儀徵縣志

李茂年興化人少師春芳子恬退樸誠不敢以富貴驕人父分宅以其長子擇善者子之固讓卒處下舍從儒者韓貞遊惓惓於講學化俗以父廕授中書舍人進尚寶丞歲大祲力請當事疏求蠲賑兼免養馬諸差邑人感之弟茂材字仲達博學能文十試鄉舉不中乃就廕每入京省父或牽小舟或策蹇驢行李蕭然人不知其宰相子也要路有司求一識而不得一巨帥慕其人遣使持千金伺國門外不敢啟口而去官尚寶丞久之進太常少卿以子思誠貴封如其官

興化舊志

史起敬字德聚江都國學生授建昌府經歷曾被流賊

活俘民有功當擢用卽乞歸弟起聘少孤比長析產起
敬推身所積均分之每濟里人困乏咸號爲長者

萬曆

府志

洪良備字備如歙人移家揚州父早歿哀毀如成人
母至孝友愛弟兄周卹貧窶廣設祭田力任族中婚嫁
事歿之日閭里嘆息

康熙府志

吳一瀾字觀瀾以鹽筴居儀直萬曆二十三年大饑邑
令募富室輸濟多不應瀾適自楚市米歸急白令曰某
有米千石願以半供賑令曰不繼奈何瀾曰直去楚雖
遠然乘風上下月餘可達若得母錢廣糴以子米利民

庶有濟也富者感動共集得官民錢若干瀾周廻糴糶

存濟無算

儀徵縣志

鄭柏齡字兌溪興化人少有足疾惜字紙而愈年六十
九行經城上文昌閣見遺楮草間俛拾之中有物啟視
皆白金書言以半治木半具喪服蓋婺源程氏客於外
父垂死寄家人者也柏齡惻然哀之覓其人不得乃遍
書招之其人行至邵伯乃覺還相見語與書合悉歸之
一時義聲滿里中士大夫爲之作詩繪圖傳於世尚書
孫慎行題其卷曰義風千古

興化縣志

宮永建字克昌泰州人嘉靖間倭寇犯境居民皆竄走

揚州府志 卷之三十二
永建父柩在堂獨不肯去子身守之曰柩存與存柩燬
與燬時比閭焚劫而永建家獨免嘗貸門人顧某錢無
券及還之顧已歿矣家人以不知固辭永建曰若而家
不受當掘置隧左耳其不欺如此七旬失明踰十年復
爛爛如故人咸異之 秦州志

史宗顯字及遠江都人知書重義有山東元克孝者來
揚與宗顯善其妻亡子以哀毀繼歿子婦抱夫木主自
經克孝貧不能殮宗顯爲之棺殯擇地以窆令子孫世
掃墓祀之通州貢士楊孟堅亦善宗顯除興安判止一
子次廣陵卒亡孟堅慟絕不欲之官宗顯勉其行以一

婢贈之冀其生子孟堅竟卒於任所適宗顯遊崇川孟
堅見夢於其友孫夢揚曰明日史君來爲我謝之詰朝
夢揚訪得宗顯於客舍語以故宗顯驚異因爲歸其喪
宗顯以明經授兩浙運判遷福建理問 康熙府志

夏應芳字元成江都人父翠幼孤貧鬻蔬奉母甘旨未
嘗缺應芳中萬曆戊子鄉試喜結客名聞於時浙人沈
氏以做書筒寄應芳家十餘年不取沈死應芳訪其子
歸之封識宛然發之書所覆皆白金計五百餘兩其子
初不知方貧無食於是感激終身里有不孝子李打虎
性凶暴忤其母應芳使勇士縛之令其母坐上座扶之

數十其人叩頭流血長跪母前請罪應芳令坐母側與食勸勉遣去遂為孝子應芳屢試不第卒孫九叙康熙丁巳舉於鄉

王巖異香集

王自學字憶齋高郵諸生為人孝義樂施子身任鄉里利害少課徒里塾得束修輒以周急嘗館於江南歲暮挾修金歸至瓜洲鄰舟一老翁持幼女泣叩之曰負官錢破產止輸六七鬻此女克其數自學惻然盡所有畀之歸而典衣卒歲鄰有凶人欲白占所居設具招致酒三行擁眾持刀環立索書賣券自學顧而嘻笑濡筆疾書拂袖出竟棄其產後子永吉成進士買地構宅其人

懼具價數倍叩頭謝自學笑而揮之曰實已忘無相疑

也終置不言

高郵州志

劉有恒其先河津人移家江都以明經貢太學性好施予嘗有惠於鄉里偶獨行遇羣盜中有識之者曰劉貢生善人也不可害護送之歸子冀鈔亦善士

康熙府志

王業弘字元伯儀真人太學生家素封布袍綦履而好交遊居家脫粟自供出精粲奉客四方名流舟車所過必禮而下之建家廟崇春秋祀撫孤篤友稱於里人

康熙府志

熙府志

高孝健字體乾江都人世有令德孝健誠愿端謹以禮

義自閑爲鄉里所取範子以位另有傳 康熙府志

劉先聲其先關中人占籍江都崇徵問貢生尋舉賢良方正性淳篤好急人之難歲凶倡賑鄉里賴之 康熙府志

扈國學字翼民江都東鄉人明末高傑縱兵擾邗東將及仙女廟國學率鄉人各持矛禦之竟不敢犯事聞給冠帶不受 江都縣志

汪文德字是修先世祁門人家江都文德自祖父來同居四世崇徵庚辰饑捐貲倡賑多所存活乙酉揚城破文德與弟文健詣軍前謁豫王獻三十萬金犒師曰願王下令勿殺王義而許之欲授以官以無才辭請歸里

給一木符令還 康熙府志

張福江都人黃國相之僕明末福與國相同遇兵國相死福頸被刃止氣喉未斷脇下亦被創從積屍中以手捧頭匍匐奉主媪避匿主媪以弱笈支其頭越數日勢定創亦稍愈始獲送主媪詣北鄉而幼主被繫至金陵福渡江行乞遍走諸營於牧場得之至夜負歸黃氏母子復聚福終老其家 江都縣志

國朝王凝鼎字鼎養寶應人有容子也歲貢生爲人仁厚寬恕有犯不校遇邑有大事輒慷慨論議不少屈寶邑登罹水旱流亡載卹邑令孫蕙訪救災彌患之計凝鼎

揚州府志 卷之三十一
條列數萬言有請申水災書有論旱蝗異災書有請申
蠲賑書有請比高興求協濟河夫書有論募繹夫書有
論建子嬰堤疏蕙一一申請施行於是災民漸以甦息
闔邑賴之晚年益好學不倦嘗纂輯程朱遺書自爲一
編又綜貫古今諸史附以已見爲稽古餘論年七十舉
鄉飲大賓子式旦讀書教子孝友著行閭里推爲長者
以子懋竑官編修贈如其官式丹癸未會試 殿試皆
第一別有傳 寶應縣志

郭梁甘泉人明侍郎任之後少以孝友聞精於醫循禮
散施行年八十八歲樂善不倦 康熙續府志

郭士璋字子秉江都人事父以孝聞順治乙酉 大兵
下揚州士璋負父匿僧舍承塵上日冒鋒刃懷餅餌入
供父在寺門積屍中聞微息跡之有七人被重創喉斷
而未死士璋俱負之就僧舍爲拭漬血以藥傅之且煮
糜以飼七人號呼指使悉應之如其意及創復始去不
問姓氏七人亦不問活我之爲某也後奉父以壽終子
銚字山題登康熙癸未進士由中書出爲瓊州府同知
聞母喪奔歸以哀毀得疾卒於瓜洲道中 江都縣志

朱爾遠字叔識寶應人明九江太守曰藩曾孫補邑諸
生好學積善不遺餘力順治初歲再饑爾遠與邑人積

揚州府志 卷之三十一
粟北郭泰山殿煮粥以飼餓者存活無算倣高忠憲同
善會每月集金冬授衣病施藥死給棺又買地爲義阡
貧民歸葬者近千冢湖廣庶吉士朱士冲舟過寶應病
歿縣丞邵輔泣任九日卒皆無以殯爲棺衾殮之且贈
賻令其扶櫬歸縣學傾圯捐貲率衆修葺殿廡齋房煥
然一新以子克簡貴封中書舍人卒祀鄉賢 寶應縣志
李濂字長源江都人明大中丞植之孫性端凝篤學力
行雖華胄淡若寒素子宗孔成進士猶挾策應舉子試
與人交重然諾苟非其義一介不取鄉里以此重之子

宗孔別有傳

康熙續府志

路登明字羽聖儀徵人有兄雲嘗造江舟多載賈貨他
舟嫉之適鎮江楊天麟之子儻戚姓之舟載貨被劫殞
命天麟跡至江干嫉雲者誣指雲訟於官拷掠誣服而
無贓狀登明購捕獲戚姓得天麟物白兄無罪有司覆
勘要重賂登明恃直不應遂反坐褫其青衿雲子之謙
叩闥白其冤登明事嫂如母誨姪如子焉 儀徵縣志

程量入字上慎本歙人遷江都天性孝友尤能周人之
急不求人知舉鄉飲賓士民翕然稱服子之諤字象六
善承父志以佃儻推重鄉黨康熙甲寅乙卯間軍興旁
午之諤籌餉急公御史郝浴上其事晉五品秩諤長子

渭航復能繼其先緒行誼有聞諛妻江氏有閨範世稱
女宗年逾九十子孫曾元百五十餘人人皆謂積善之
餘慶云 江都縣志

徐登明字華谷興化人爲人孝友謹飭父母沒登明年
已七十孺慕如幼時常舉司馬溫公省浮費禁奢華存
羸餘以補不足之語戒其子弟以子烜貴封通議大夫

山西布政使

康熙府志

郭光宇白瞻梁之孫世居甘泉縣雍熙里光性孝友親
歿五十餘年哀慕未輟伯兄子失於兵傾囊贖歸與已
子無異視仲兄孫幼以已子爲之子凡師友之無後者

春秋爲位祀之晚年猶嗜學不倦膺歲薦舉鄉飲賓子

延齡彭齡鶴齡嗣齡九齡皆有文行彭齡嗣齡登科甲

孫泓沅俱舉人長源舉壬子鄉試第一

江都縣志

張坦字莘野甘泉人幼失父哀毀如成人葬祭咸中禮
母教之以正因敢違時予之杖怡然以受里中旱疫坦
出穀施藥以活人蓋孝而兼惠云 康熙府志

閔世璋字象南本歙人世居江都自奉惟老屋數椽布
衣蔬食而遇族黨貧老孤獨者竭力周之葺學宮新聖
賢像歲稔設法捐賑全活甚多通郡皆稱爲善人四舉
鄉飲大賓卒祀鄉賢其所創育嬰堂規畫周詳至今因

之子寬樂善好施克紹父志

康熙續府志

張廣字敏公高郵人順治辛卯拔貢性慷慨常以濟人利物為己任乙巳歲大澇饑饉遍野州牧催科急迫晝夜刑比血肉狼藉廣具呈請寬不應即出已囊代貧民數百人完納二千兩有零又多作飯食布州前應比人皆空腹受杖啜之得不死丙午遣子忠給貧民米稻百數十石郵有守備張某清廉被誣及卒二子皆下獄廣聞其無辜力為救恤竟獲保全明遺老劉文炤忠臣文炳弟也寓郵貧甚廣存活之又贈金完其後事他如請蠲請賑陳版荒諸事靡不出貲為眾人倡廣學遠行優

屢蹟場屋人甚惜之

高郵州志

程爽字青來本歙人僑江都補郡庠生慷慨好義己丑歲客游湘潭夜泊河干聞哭聲哀且眾曉起見白骨山積其地蓋戰壘也罄囊盡為收瘞湘人建亭以誌其德至今尚存又有邑紳某者罹誣罔爽捐重資救之畧無吝色

康熙府志

劉長發字存永其先河津人遷江都登康熙朱進士宅心寬仁動合規矩閭里稱為篤行授中書舍人遷虞衡司主事議免閩粵仙霞解炮之役甲子與試廣東號稱得人

揚州府志 卷之三十一
梅魁先字占百江都貢生康熙壬戌與友至賓同客都門賓以百金寄魁先所無一人知及賓歸發緘哀慟死魁先歸里至賓家出原金置賓靈几哭而還之

江都縣志

史在策甘泉太學生居常置義學教族孺子弟事師最謹歲凶煮糜粥以賑饑疫施榻榻數千瘞死者家僕誤聘良家女急毀約謝之子衡郡諸生以學行稱孫慶義申義皆進士

江都縣志

胡夢豸字去邪先世上虞人遷江都性至孝康熙甲寅年二十二歲隨父歸越省墓父過市遇山賊劫民財豸父嗔其不義賊怒將刃之豸從後奔至以椎擊賊仆市

民遂羣起毆殺賊賊衆大至欲屠其里豸曰不可以我故危一鄉也挺身入賊寨獨承之遂被寸磔求遺骸不得里族感其義爲購首藁葬歲時致祭焉

江都縣志

程洪字士莘奭之子也生具至性數齡居父喪哀毀如成人奉孀母極孝事兄交友克恭克義有故戚家業中落僅一子遠出十餘年不知所往洪爲募人四出求得之以歸適其父病將殆獲一見其子而卒洪更經理其喪塋爲其子成室家又黨族中有貧不能婚者輒與以金完娶不使人知其生平之篤行類如此洪才美而好學所梓有唐詩快詞潔記紅集行於世子樅梅楫俱有

揚州府志 卷之三十一 名閭里

余士覲字瑞輯新安人家江都少時父病不食亦不食至愈乃已年逾七十歸里改葬其親徒跣數十里哀慕如初喪行路爲之生感爲族子婚娶無子者更爲置媵衣冠子女之淪落者捐贖之親族貧不能殮者爲具棺槨歲遣人市木於饒儲積以備所需後先約五百具至有嬰救生倡賑尤行之必力舉升賓筵年八十五以無終

唐詩字盛唐甘泉人父之天家素饒破產贖還民間子女之被掠者甚夥由是家置之詩後繼伯氏嗣母萬氏

孀居紡績教詩讀書詩年十七補諸生旋食餼雅善詩文工書法甘貧守素教授生徒至老得歲薦於榮利泊如也中表饒於產而無子憤其弟願以已產立虛券授詩詩嚴拒不受其不以冥冥墮行類如此六子皆有文行登科第仕版者五人紹祖繼祖繹祖續祖綏祖

縣志

江都

王藻字素修高郵諸生順治十三年與州人張陽共發拯救入難之願育遺嬰施棺槨造船救生開局施藥悉竭貲募衆以次舉行學宮久圯藻與州人黃閣等重修規制一新三藩靖亂後婦女被掠北行州進士吳世杰

捐貲贖回難婦葆奔走道途集白金百兩助之念囹圄
卑濕囚易染疾爰呈當事鋪設地板使縲絏者得安寢
處凡平生所行垂老不倦州民賴之 高郵州志

張陽字靜生高郵諸生淡於進取力行諸善事戒殺放生
施棺給絮掩骼設義渡郵獄囚多所周濟其尤善
者與里人建育嬰會以拯遺嬰設施藥局以救病苦且
募田若干畝市房若干區贍之俾可久長卒年八十八
歲子默中康熙癸酉鄉試 高郵州志

王復衡字山公儀徵人居甘泉以恩貢入太學爲熊賜
履龔鼎孳所器重居家孝友惇睦宗黨中待以舉火者

常數十人孀姊二俱養於家待諸甥如已子儀邑正賦
外有五股差徭苦累復衡力請上官勒石永禁通邑德
之後以中書需次主事以子貴累封朝議大夫卒年八
十六子誥丁丑進士歷官洗馬文充癸丑進士選庶吉
士諸子及孫多登賢書列明經以文學世其家 江都縣志

方祖隆字爾鄧歙人遷江都有至性母吳病膝行禱於
山兩附盡腫待兩弟友愛誠篤尤能用恤貧乏鄉人德
之子覲別有傳 江都縣志

卞祖愛字合凡江都諸生讀書力學以孝友稱於鄉黨
子兌陽亦諸生父母歿皆廬墓三年人謂其不負庭訓

康熙府志

卷之三十一

魏都字虞成江都貢生居瓜洲順治己亥海寇猝至都適送母避湖中父尚在城內都急徒跣奔百餘里雜負擔者入城負父出母病膈不能食都侍榻前每日止啜粥一盂尤能濟人危急周族姪之媳俾得終節所著有晚香閣集子嘉琬別有傳孫元嶠舉於鄉

江都縣志

李茂字子容甘泉人幼時父摩其頂曰是兒體骨不凡待鬚長必成令器後果鬚長尺許而父已亡茂悲父不及見母顧輒泣偶脫卽檢貯囊中且撰惜鬚記以紀之婚時青袍母手製也每祭必服而拜且拜且泣臨終遺

命以青袍鬚囊殉焉性友愛與昆弟終身式好教子孫崇勤儉嘗客漢口人烟稠密多迫於火災茂購民舍若干楹闢巷里許名曰永寧全活甚衆至今德之以子天祚貴封朝議大夫卒祀鄉賢天祚尚義樂施克繼前志官鴻臚寺寺丞

卞漢陽字楚度江都諸生弟汾陽以事被累漢陽代至官引爲己罪官知其誣得免生平周恤三黨敬禮師友鄉黨咸推重焉

江都縣志

汪朔周字曼思歙縣人以業醴遷江都篤於孝友族姓中多荒田賠糧之苦朔周捐置腴產以歲入抵糧永以

揚州府志 卷之三十一
三
為瞻戚黨中有急解推不少吝舉鄉飲大賓以子職
封內閣中書子文蘭候補國子監典簿孝義樂施亦多
善行

黃家珮字鏘鳴歙縣人徙居揚郡事親志物咸盡為人
好義急人之難不留餘力歲乙巳海溢捐金修范公堤
大水洧饑多方設賑全活無算

康熙府志

閻寧生字天皆甘泉歲貢生篤於孝友季弟班生早世
寧生思念不置日往號於墓側聞者哀之晚年授望江
訓導以老疾辭

劉夢錡字端調江都國學生母早亡事父盡孝每冬夜
必抱父足而臥父既歿所嗜飲食終身不復進有以子
女來典鬻者必量其急周之而還其子女有儀徵吳姓
者乍交也疾篤以老母幼弟相托夢錡養之數十年且
為其母治喪為其弟授室焉

景于禮字子介江都人性孝友父歿讓應得之產與其
兄弟而以舌耕養母母歿喪葬胥以身任之其三兄貧
無子于禮養且塋事嫂一如兄撫少弟尤篤以子考祥
貴贈監察御史

汪文煥字有章本歙縣人遷居江都幼為叔父嗣嗣父
早亡奉嗣母盡孝既卒請旌建貞節坊又以本生母遇

海氛節尤烈格於年例不獲請旌篤老猶爲飲泣撫孤
姪如子振貧周急遠近稱長者以子職封中憲大夫
汪應庚字上章先世自歙僑於揚祖復祖父修業皆有
隱德應庚克承先緒建宗祠周族黨於兄弟間極友愛
視諸姪如子撫其外父之孤歷二十年爲殖其遺業倍
歸之歲施棺絮濟醫藥拯溺育嬰久而不倦雍正九年
海嘯災作糜以賑伍祐卞倉等場者三月十年十一年
江潮壘泛洲民仳離應庚先出橐金安集之隨運米數
千石往給焉時疫癘繼作更設藥局療治之十二年春
復運穀數萬石使其得哺以待麥稔是舉計存活九萬

餘人又於鄰邑之丹徒興化亦皆輸粟以濟事聞

世宗憲皇帝特授光祿寺少卿郡邑屢舉鄉飲皆辭不赴唯
務敦行不怠出五萬餘金修建府江甘學宮以二千餘
金製祭器樂器又出萬三千金有奇購腴田歸諸學以
所獲供歲修及助鄉比士資斧且請永著爲例乾隆三
年歲飢首捐萬金備賑後公厥者賑期竣更獨力展賑
八廠一月用米至二萬八千九百餘石所賑至九百六
十四萬一千餘口其博濟者如此又素樂修廢墜崇節
義興復平山堂棲靈寺皆成勝觀建平山堂之五烈祠
並爲請旌表其墓在城之貞節祠亦其所改建而增擴

也乾隆五年春以故里新祠成返修祀事輦金分飲其宗人親疎有差等而無一遺其澤者遠近尤艷稱之予起官刑部郎中

江承炳字雲岑歙人遷居於揚遂占籍候補員外郎賦性孝友存心利濟凡恤貧拯急救焚施糶贈棉濟渡以及修理橋梁道路皆力行不倦乾隆二年鄰邑丹徒偶歉復捐貲萬緡糴穀往賑督撫欲爲題

旌承炳具呈懇辭再四紳士公舉鄉飲正賓亦辭不應其存心謙退善藏德隱類如此

隱逸

春秋漁丈人伍子胥奔吳至江有漁父乘船沂水而上子胥亟呼曰漁父渡我會旁有窺者漁父歌曰日月昭昭乎侵已馳與子期兮蘆之漪子胥卽止蘆中漁父又歌曰日已夕兮予心憂悲月已馳兮何不渡爲事寢急兮當奈何子胥入船漁父乃渡之旣渡漁父視其有饑色謂曰俟我樹下爲子取餉漁父去子胥疑之潛身深葦中有頃漁父持麥飯魚羹盞漿求之樹下不見呼曰蘆中人蘆中人豈非窮士乎如是者再子胥乃出漁父曰爲子取餉子何嫌哉子胥曰性命屬天今屬丈人豈敢有嫌飲食畢子胥欲去乃解百金之劍與漁父漁父

辭不受子胥誠漁父曰掩子之盜漿勿令其露漁父諾
子胥行數步顧視漁父已覆船自沉於水中矣

吳越春秋

明盛儀云舊志載儀真胥浦爲子胥渡江解劍之所
漁父蓋寓江上而隱於漁者也

漢應曜淮南人漢初與四皓同被徵不至時人爲之語

曰商山四皓不如淮南一老

嘉靖惟揚志

三國劉穎廣陵人精學家巷孫權聞徵之不就

吳志

晉韓績字興齊廣陵人父建仕吳至大鴻臚績少好文
學以潛退爲操布衣蔬食不交當世東土竝尊敬焉司
徒王導聞其名辟以爲掾不就咸康末會稽內史孔愉

上疏薦之詔以安車束帛徵拜博士績稱老病不起卒

於家

晉書

唐李孝感江都人博學好古雅修彭聃之道尤以慎篤
著於鄉里考行議德諡曰正隱先生

金薤琳琅

宋孔旻淮南人隱居篤行終身不仕美節高行

沈括夢

溪筆談

王伯起字興公海陵人父綸爲太常博士伯起當以恩
得官遜其弟舉進士不中嘆曰士不自重與千百人旅
進坐軒廡下獻小藝規合有司可恥也與其冒恥以得
祿寧貧賤而肆志焉於是閉門靜處踰三十年鄉人多

不識面善詩歌獨得深造名著東南部使者薦諸朝不起仁宗英宗兩賜粟帛郡人王覲誌其墓

嘉靖惟揚志

王覲誌畧曰先生不有其道而道信於朋友不尸其名而名聞於朝廷與夫懷印曳綬乘肥衣輕自以為得意而死之日民無稱焉者異矣

王令字逢原廣陵人年十歲晝從羣兒戲夜獨誦書往往達旦為辭章雄偉老成家貧乃聚徒天長王安石赴召道由淮南見令大喜以其姨妻之安石嘗與書云始得君文獨愛君才既而見君衣利履缺語未嘗及己之窮終歲食不如葷不以銖忽妄售於人世之自立如君

者有幾後徙居江陰卒著論語孟子解義及蒙求一卷廣陵集十卷

王安石文集

劉發傳畧曰先生聞一善言見一善行輒嘆慕自以為不逮事寡姊如事父教姊之孤兒不啻己子歲時祭祀於其考妣必流涕親識饋遺纖介無所受諸生有獻度其家貧禮雖甚勤不取也

傅集儀真人以行義文學為鄉里推重徽宗時勅舉八行刺史郡守以集應詔屢勸就道集堅臥不起時人高之

萬曆府志

元高椿江都人元季避地姑蘇張士誠據吳郡遣幣聘

之椿峻拒不就閉戶讀書歸隱興化 康熙府志

王貞字以道江都人元末避地吳下張士誠授以德清

教諭堅辭不受洪武初歸鄉里葺茅舍以居 嘉靖惟揚志

明張長年高郵人素以文行知名明初禮部主事劉庸

舉明經者儒達於治體者長年與新安鮑恂梁溪余詮

皆在舉中時年七十餘驛召至京太祖見之喜賜顧問

命為東宮官皆以老疾辭上諭之曰以卿等年高故授

此職煩輔導東宮耳免卿早朝日晏而入從容侍對庶

不負卿等平日所學何辭為長年等固辭放歸鄉里 嘉

靖惟揚志

成廷珪字原常興化人隱居府城種竹數竿因號居竹

養母甚孝不求仕進其所與游多至尊顯而未嘗有所

干四方士過淮南者多歸之有長者之譽博學工詩有

居竹軒集 嘉靖惟揚志

楊寅江都人府學生永樂初召書令字旗高丈餘一揮

稱旨賜金帛鞍馬命署泰州辭不拜後徵入京乃避地

於晉十年方回 嘉靖惟揚志

高稷字世良興化人文義穀之弟性清介耽隱兄穀為

相稷足不及公門布衣蔬食燕坐蕭然儼若禪寂人稱

素庵先生學士楊溥題其宅有明時巢許怡東海會際

揚州府志 卷之三十一
夔龍接上台之句

興化舊志

朱瓘字楚琦寶應人通尚書周禮爲詩體韻道逸性嗜琴畜雙鶴鄉人稱爲琴鶴先生大學士費宏嘗曰戴安道之流也景泰間有詔舉賢良都御史王竑欲薦之瓘聞遁去後舉修天順實錄及淮揚志贈遺俱不受

萬曆

府志

陸彌望字道叅興化人性嗜學不妄言笑以聖賢爲師平居取予毫髮不苟足不履城市縣尹魏炭以詩卻之嘗曰君子居一鄉則當有益於一鄉居國居天下皆如此

興化舊志

周安字邦泰寶應人結廬東谿邑人稱曰東谿先生性澹素閒適爲詩千首皆道東谿隱逸之樂時又有施琳字汝琬亦隱士能詩稱林塘逸叟

寶應舊志

吳禮字中節寶應人奉母祁氏以孝稱年四十貢入太學念母老不能去左右乞罷歸授州判官許以終養人擬之唐何蕃母卒不復仕結廬梨花莊日與朋舊過從吟嘯竟日所著有蓼莊吟稿又有周朝字光卿嘉靖九年歲貢絕意仕進足不涉城市者數十年

寶應舊志

吳纘姬字璣灘泰州人其先以戍籍家登州纘姬中崇徵庚午鄉試山左亂挾弓持稍護親出重圍歸於海陵

流離奉親不缺甘旨之養及親歿嘉遯不仕甘老邱園人咸高之

泰州舊志

吳敏道字日南寶應人生有異才爲諸生邑人朱日藩見其詩異之與爲忘年友郡邑大夫皆賓禮之後貢入太學未幾焚巾服歸隱湖上鄉人犯義者常畏其知有疑輒就質之一賈人被罪非實敏道爲白理官出之函百金謝卻不受其人因構亭名郤金徵詩贈之有集數十卷王世貞爲之序

萬曆府志

王醇字先民揚州人生而早慧讀書如夙識弱冠善賦從季父遊長安日醉市樓人求識面不可得會麻大

將軍大閱將士醇輕裘快馬馳突演武場引弓破的矢矢相屬掣雙劍飛舞霎忽如崩雪大將軍降階執手欲舉以冠一軍醇笑謝家本書生聊用遊戲耳父母命之室以羸病辭爲兩弟納室徧游吳越佳山水日叅內典歸廣陵之慈雲庵顏其室曰寶藥樓自知時至結跏趺坐而終

列朝詩小傳

趙潔字宗瑩興化人素履端方淡於仕進晚構一樓臨水際與楊侍郎果及知交徜徉其間果以恬庵號之有司請賓於鄉二十八次亦僅事也

興化縣志

張奇字正甫江都人初學制舉入郡學久不屑意學詩

畫皆極工家貧而傲日與郡之賢士大夫游中年喜天
官象數家言當萬曆季遂移家金陵及馬阮輩竊權寵
附者如靡知處士名造焉不報閉門以老預尅死日自
題其棺曰飲白水四十餘日遂歿年七十有四

康熙府志

陸西星字長庚興化人生穎異才識宏博於書無所不
窺爛文辭兼工書畫為諸生名最噪試棘闈不售遂棄
儒服冠黃冠為方外之游數遇異人受真訣乃纂述仙
釋書數十種所註莊子尤盛行於世

興化縣志

顧鐸字覺斯江都人幼喜讀書不事生產崇徵甲申聞
流寇李自成犯京師憤懣號哭數日不止旋築居江濱

種梅花數十株日吟咏其下終其身足不出戶自號遺

叟云 康熙府志

國朝雷士俊字伯顛先世涇陽人居江都之艾陵湖士俊

幼為諸生後棄去專力於經史百家熟悉古今治亂得
失之故辨別君子小人消長進退之機其為文銖心劇
胃既脫稿猶必琢磨再四始出以示人而貧老負氣悲
憤得疾以卒所著有艾陵文集二十卷詩二卷祀郡學

鄉賢

江都縣志

長洲宗伯韓莢贊其像曰弘道其如

命休論行與藏先生老被褐已升作者堂艾陵書
一編窮理析寒芒一時來學者千里或裹糧而我生也
晚不及弟子行俎豆側嘗聞幽微宜闡揚豈不符甲令
忍獨私庚桑邗溝舊
里居我來炷瓣香

張璠字韞玉寶應人崇徵壬午舉人一赴公車後遂絕
意仕進以理學節義自勵勵幅巾野服有古逸民之風
焉最後有仇璠者攻璠璠不得已會試至京師入場以
墨塗卷而歸終身不仕

寶應縣志

葉彌廣字博芝江都人生賦異才臨文搦管卽書迅如
泉湧以諸生高等貢入太學不樂仕進散服逍遙怡情
詩酒康熙十二年纂修通志郡縣聘彌廣任其事咸稱
得人一日雪滿庭堦欣然浮白賦詩盤桓竟日忽訣家
人曰吾逝矣遂卒同時有強惟良阮玉鉉皆高曠稱博
學士林重之

江都縣志

李沂字艾山興化人幼孤事母孝補邑諸生及壯不求
仕進以詩歌自娛深入盛唐大家室江淮南北數十年
言詩派者以陽山爲正而陽山之詩醇雅典則以沂爲
依歸沂和平坦易遇物無所凝滯獨於名義不少假晚
好神仙聞芒碭山中有道士千里從之歸語人曰非母
老沂不返矣所著有鸞嘯堂詩集

興化續志

吳嘉紀字野人隱居泰州之東潤其先世竈戶也有兄
世其業苦草場累境日窘嘉紀授經里門時時以所得
脩脯濟其兄自食不能給二鬴恬然安之日攻力詩歌
以自陶寫沈澁雅健得少陵正脈晦跡海濱甘心窮餓

不屑爲釣名竊祿計而海內宗工言詩者交口延譽願見其人至想像不可得既死友人哀其遺稿刊之名陋

軒集

康熙續府志

王貴一字象山興化人少叅繼美之子也爲人剛正負氣不隨人俯仰一切聲伎擣博之樂惡之如讐相國吳牲於貴一爲至戚未嘗有所干託孟津王鐸少叅所薦士居顯仕招之不往甲申後謝諸生業益肆力於古文辭教子仲儒熹儒皆知名

康熙續府志

王巖字築夫寶應人初爲諸生名天祐及更今名遂絕志進取以古今著作爲己任其文考據經傳深入八家

閩奧執經請業才雖相安若李推官念慈汪主事懋麟皆學又於巖爲人端嚴動止語默中程度事母以孝聞凡祀其先人致齋三日獨處於外所著有白田詩文四十卷異香集二卷

寶應縣志

陸廷掄字懸圃興化人少負異才博聞彊記以能文知名甘心隱約不屑爲榮利計日坐臥小樓足不入城市者三十年專心致志尤在史學上下千百年邪正是非治亂得失之故與寶應王巖往復辨難議論皆有根柢同邑李清稱其心口並瘁旣枕籍而厭飫之故其文體大思精必傳於後也所著有酪酌堂文集行於世

興化

黃雲字仙裳世居泰州之姜堰鎮窮研經籍少即以詩
文名家慷慨尚義志欲與東漢人相頡頏初受知於太
守陳素素乏嗣被枉破家雲不避險難與之同游汝寧
竭力周旋人以爲難晚年愈貧苦屢辭聘召益肆力於
詩歌東南言風雅者必宗焉所著有桐引樓集七律分
韻五言詩抄行世

泰州志

宗元豫字子發其先興化人居江都潮州府判萬化子
也萬化卒於潮元豫行萬里扶櫬歸而囊空如滌不能
買地以葬乃蔬食不除服餘十年始得葬自是遂不求
仕進惟肆力經史發爲文章具有根柢同郡王巖於人
少許可而獨盛推元豫寧都魏禧嘗與往復辨論禮制
亦嘆其難及性廉介不與俗流歎曲雖敝衣糲食恒自
意也著史論數十篇皆前人未發雜文亦數十卷別有
識小錄若干卷紀廿一史中瑣事爲里人所傳

江都縣志

王巖異香集云宗子高節自好其位置已庶幾嚴子
陵之遺風矣以其才發爲詩歌則鼓吹風雅書序論
議紀載之文出入廬陵南豐諸大家

湯廷頌字欽哉寶應人邑諸生未老棄去放浪泉石間
翛然自遠莫林和靖爲人因自號梅逋藝梅數十本雜

以桐桂松杉畜一鶴馴甚凡讀書飲酒對賓客入市井皆與鶴俱從順天梁以樟遊相倡和盈百餘篇

寶應縣志

蔣易字前民江都瓜洲人少補諸生卽棄去家故饒有洲田數十頃坍於江遂致窮餓意泊如也爲詩不取時好五言律尤勁健得少陵風格黃岡杜濬與友善甚稱之晚年無子家益窘賣畫自給人得其寫生一二筆爭

以爲寶焉

江都縣志

史以甲字子仁甘泉邵伯人明按察副使啟元之子幼補郡諸生長乃絕意場屋隱居艾陵湖東之橋墅畊讀自怡足跡不入城市自天文地理以及方伎醫藥百氏

之書無不究覽所輯文獻通考抄三十卷學圃隨筆十

卷勾股籌算捷法二卷傷寒正宗七卷皆刊刻行世復

廣吳淑事類賦爲七十卷藏於家子炤隱居著書能述

父業

江都縣志

顧符真字瑟如興化人幼從父士奇令江華卓犖有異才後以父入覲卒於京遂棄舉子業致力詩古文辭兼工畫法窮幽極細得顧虎頭小李將軍不傳之祕符真懷奇未試蓋以畫隱云

參湯來賀喬萊序

高懋賢字聖期儀徵人幼好學窮經不趨榮利曾挈家隱寶應蘆村以水患復遷儀年老益貧茅屋數椽常三

旬九食忍饑講易絕無憂悴之態生平不妄交遊唯與弟懋功閉門著書甘貧抱節年九十一卒有楸馨草堂學易小刻並纂註易經若干卷

陶澂字季深後以字行曰陶季寶應人幼負異才究心經史百家之學崇徵末兵燹坎壈遂棄舉子業力攻詩規樞六朝三唐翛然吟咏自適其性貧居無一事干人唯以硯田給妻子更喜遊覽足跡半天下所撰著多得之舟車因名舟車集蘄州顧景星序之曰二百年來山林無此詩矣康熙己未特開博學宏詞科名公卿將登薦牘堅辭免以逸民終

魏衛字廓功原直隸栢鄉人先世遷儀徵遂占籍焉少孤好學隱居教授暇則行吟江上與高僧逸士相往還不言世事以布衣老詩如孤霞映日淡然塵表尤精書法邑人珍之所著有西陲集臘山遊記

文苑丁卯

揚州府志卷之三十二終

揚州府志

卷之三十二人物隱逸

三

